

西園聞見錄

西園聞見錄卷之二十八目錄

外編

宰相下

往行

費文憲公宏

楊文襄公一清

蔣文定公冕

翟文懿公鑾

張文忠公孚敬

呂文安公本

徐文貞公階

嚴文靖公訥

李文定公春芳

高文襄公拱

陳文端公以勤

張文忠公居正

趙文肅公貞吉

張文毅公四維

馬文莊公自強

申文定公時行

余文敏公有丁

王文肅公錫爵

許文穆公國

王文端公家屏

陳文憲公于陞

趙文懿公志舉

附

西園聞見錄卷之二十八

外編

嶺南 張 董孟奇甫 輯

晉陵 陸自嶽層霄甫訂梓

宰相下

往行

費文憲公宏正德六年以禮書入閣與李公東陽楊公廷和梁公儲輔政正德九年以太子太保武英殿學士致仕十六年復入嘉靖六年致仕先是江西盜甫輯而復叛遣總兵李鏐率邊兵往討之未幾鏐以疽死本兵議遣劉暉往代鏐暉皆良將先嘗平河北諸盜者也與暉同薦者某則以萬金賂錢寧求行寧陰譏中使屬公票擬公執不可竟用暉寧因銜公既而寧當得誥贈三代欲假此交權乃具百金飲器二遣所親餽公公拒之寧益慚恚無何宸濠來請護衛賂寧鉅萬金冀爲內援且逼結納諸當路獨憚公不敢近越數日疏下內閣內侍問所以處分者公因極言濠跋扈不臣將借護衛以爲羽翼耳不與之便明日下兵

部看詳又明日日本兵某遇公于闕下問所以覆奏者公曰其護衛曾兩
革之矣今可復與乎某曰第恐不能不與也公斃然而入曰公自任之
既而竟與之時濠使在京知公沮濠而錢寧恨公發其奸思有以撼公
乃遣邏卒日夕伺公門冀甘心焉經月竟無可指摘會同列有嫉公而
思窺其位者乃陰助寧一日忽傳旨詰責公公引外請休退遂有旨令
公致仕而從弟翰林編修竊亦罷職五月南歸舟至清源濠黨陰遣人
于舟中縱火行李皆爲煨燼寧又使人尾公舟窺公至是見舟焚而無
餘貲遂以是復寧乃已濠因朝會殺孫公燧及副使許公達遂擅兵反
隨遣數十騎趨信圖公過進賢爲中丞劉公源清所斬而濠方一意向
北無暇東顧遂無他或勸公避之者公弗爲動且謀與弟竊起義兵勤
王會陽明王公方以羽檄徵兵列郡信守周朝佐鉛令杜民表等率兵
往公皆爲之贊畫方略且遣人間道致書王公議兵事濠平王公欲以
公功聞公力辭焉侍御謝君源伍君希儒方隨陽明公紀功乃竟奏曰
大學士費宏編修竊當護衛之再請也昌言明沮已懷先事之憂及逆

謀之既成也間道獻策又急動王之義既而巡按漁石唐公給事中祝君績齊君之鑿易君瓚御史章君綸甯君欽皆連薦公事下吏部題覆時武廟南巡未及處分逾年而上入繼大統甫旬日卽降勅起公而竊亦召用時正德十六年四月也公具疏辭溫旨慰留戶部以各省通賦甚多請自弘治元年以后逋者皆如數徵之公言歲遠人亡自難卒辦擬自正德元年始太僕馬匹頗富其寄養于畿郡列縣者大爲民累而又不足以供武備諸道之馬歲賦者如故公公因兵部之請擬自今歲解馬及價各十之一自是馬不缺而積有餘漕運輕齎銀餘者舊皆貯京通二倉公議以外衛軍士終歲勤働竭力以供京軍今脚價有餘自宜分給諸卒以蘇其困皆從之大同卒叛殺參將賈鑑巡撫都御史張文錦勢頗洶議者欲遣將出師大舉以討之公曰變出於激不叛者固多也討之勝則玉石俱焚不勝則彼拒城抗命損威傷重實多矣莫若徐圖之議先遣兵部侍郎李崑往撫諭以觀其變而以都御史蔡天祐往巡撫命都督桂勇鎮守其地代還舊總兵官江桓遂以其事責之有成

算矣願在廷之議紛紛不一上乃遣戶部侍郎胡瓚提督京邊官軍數千駐宣府傳諭天祐勇令取首惡一時擒獲略盡而瓚欲稍振軍威又飛檄欲有事大同鎮城城中卒甚恐又協衆團勇將殺之勇之童僕死者數十人賴故將某遮勇至其家獲免衆因願命某爲帥朝議不可公曰莫若始聽之而因責其擒賊及命下某果感奮擒脅勇者幾百人誅之鎮城以安時上以御製詠春詩及四景律詩命公等恭賀自是日有聖製皆命公和之又賜御製七言古詩一章是日大雨上御平臺召對命自左順門度文樓歷中左門而入時以爲榮嘉靖十四年公堅以疾乞休上允之未幾有旨起用遣行人王獻芝捧勅促公行時方溽暑或謂行宜稍俟涼爽或謂宜先具疏辭公曰吾名位已極年且衰邁豈志于進取者哉願君命召不俟駕乃聖人之訓而鞠躬盡瘁死而後已責古大臣事也吾豈務謙遜之虛名忘事君之大義哉遂于六月朔日冒暑以行時弟案方爲南祭酒適北員缺上欲用案論吏部推舉成命已下矣有相知者謂公初入朝而案卽北調恐涉于引用親黨之嫌公深

然之卽上辭疏上亮公之誠案不調

楊文襄公一清雲南安寧人寓京口正德十年以少傅武英殿學士入閣時武皇帝多微行公奏曰聖駕出宮經宿乃返文武羣臣皆不與知塵埃中萬一奸發奈何疏入武皇帝大驚遣官釋諭正德十一年公屢疏乞休允之嘉靖四年以兵部尚書巡撫都御史復起公入張桂二臣恣肆著聞上亦厭之每降諭懲戒言官多有論劾給事中陸燾上疏極陳張桂罪狀有浮于錢寧江彬者上怒欲重罰二臣又念議禮之功革桂散官致仕令張暫回家省過上忽降勅諭宣揚二臣罪惡于午門百官聞之動容公聞之亦愕然驚訝越二日桂先行次日張乃行縉紳無一人祖餞於道路人多有擲揄之者又一日上問公曰瓏可留乎公曰朝命方下未可遽變且瓏妻久亡每欲歸葬莫若待其回家葬畢詔取回京則公私情兩無損矣於是瓏深憾公不爲將順請留又以陸燾之奏疑公所授方二臣行時卽私謀于霍公韜韜懼有齒寒之勢遂上疏攻公於朝宸聽尙未爲惑次日降旨追還瓏於道公求退愈切上屢

降溫旨慰留時內閣無人辦事公姑強出一二日且將與璵暴白衷曲
卽引歸霍懼公出不利於己復上疏誣公上始有投符之疑矣璵回京
見公偃然自負曰若吾在閣韜敢有是言邪公笑不答再疏乞歸上乃
俞允公行日舉朝士大夫有祖于南郭門外者有祖于五里亭十里亭
者有追祖於張家灣者冠蓋擁道之盛近未之有也適大學衍義修完
進呈欲行賞典當位者以公先去去公名氏若無預焉者上怒曰修書
實肇於楊一清又嘗序諸後乃可獨遺乎命再補列遺官賚賞金帛於
家又方議分祀禮紛紜不一上軫念曰朕誤放楊一清歸矣若彼在能
無決乎而其言遂洩于外仇公者懼公再起日夜合謀誣前籍張永金
少者乃永弟容侵尅持慶公壽又於奏詞內謂公作墓誌受金帛若干
文致坐罪舊例刑部獄具必堂審付大理評之然後奏報彼徑奏報上
亦未及審遂依擬行以削公秩彼又恐公論不服諷同年給事中趙廷
瑞論劾乃革公官行巡按追金尋亦罷追衆謂當進辯公曰吾心無愧
得失在彼吾何辯哉飲酒奕棋如故卒無一言及之公之寢疾也前半

月公嘗自歎曰吾疾不起矣使是疾早發則吾得早歸林泉使是疾後發則吾得白心迹今適當蒙昧之際而是疾乃發嗟乎人將以爲口實也嘉靖九年八月十四日夜四鼓公遂卒是夕寒風颼颼堂戶閉皆洞冥有一卒過公之門恍惚見公輿出騎從甚盛卒私念曰吾聞公病今將何之公病走耶及聞出大市又遇公如故天珙方罷公沒先正德五年庚午慶府安化王寘鐸反寧夏殺巡撫都御史安惟學總兵姜漢上命太監張永討賊永奏須文臣有智謀者一人同行召公仍總制陝西延綏寧夏甘涼各處軍務協同討賊公謂永曰藩室亂易除國家內變不可測奈何永曰何謂公曰寧夏事不足平非久當有捷報內變事非公無能爲也永佯若不知纔入陝界果聞仇鉞已擒賊永服公料事有神促席問內變事公手畫瑾字永曰渠日夜在上傍不離上一時不見渠不樂今其本幹枝葉連結已成上傍皆其耳目安從得間入一言乎公曰此自有間可乘觀討賊不付他人付公上意可知矣言已卽袖出二奏與永一言寧夏事一言內變事囑永曰公班師入京見上先

進寧夏奏上必就公問公跪言請屏人語乃進內變奏永曰卽不濟奈何公曰他人言濟不濟未可知公言必濟顧公言時須有端緒萬一不信公頓首請上卽時召瑾抄其兵器請上登城驗之如無反狀殺奴姪狗又頓首涕哭上必怒瑾瑾誅柄用公益矯所爲呂強張承業暨公千載三人耳但須得請卽行無緩時刻永勃然作曰老奴何惜餘年報主乎已而永入京請見如公策上覽奏至瑾姪劉二漢方面大耳已謀不軌遂頓足卽召瑾入侍瑾不知已有別旨差永抄沒其家矣上命縛瑾下獄時尙未甚信及登城閱所抄兵器繩繩不絕始吐舌竟誅瑾等一時公卿士庶方能吐氣懽聲震天摘瑾肉而嚼者如市永乃備言于首相長沙李公同薦公才望上益喜公嘉靖十八年勅公經略邊務兼巡撫陝西禦虜虜素畏公威名聞公至遁去改總制三邊延綏城堡據險寧夏甘肅河山阻隔賊雖侵犯爲患猶淺惟花馬池至靈州一帶地里寬漫城僅稀疎兵力單弱一或失守虜衆拆牆而入犯我環慶寇我固原深入我平鳳臨鞏其間漢土雜處倘兵連禍結內變或因之而作

根本動搖誠非細故此所謂膏肓之疾腹心之害也成化初年北虜在套彼時未有邊牆恣肆出入已而得巡撫寧夏都御史徐廷璋修邊牆二百餘里開濬溝塹一道又得巡撫都御史余子俊修濬完固北虜知不能犯不復入套者三十餘年世平人玩邊備稍疎牆旣日薄溝又日淺弘治十四年大虜由花馬池拆牆而入殘破內郡虜人得志始以我邊牆爲不足畏連年擁衆拆入我軍動輒失利寧夏鎮巡屢奏乞築牆濬塹提督軍務都御史琳又乞於花馬池韋州設立營衛兵部奏下總制尙書秦紘止添修四五小堡及於靖虜至環慶地方挑挖邊塹一道七百里自謂可無虜患弘治七十八年冬虜復大舉仍自花馬池清水營拆牆深入紘所修邊塹營堡不能捍禦阻遏攻陷清水營殘破花馬池上厓宸慮勅公經理公歷官陝西有年虜情邊事頗嘗究心但腹裏頻年旱荒倉廩空虛饋餉不繼虜賊動號數萬倏聚忽散未至而廣徵士馬則徒費芻糧旣至而調兵應援則緩不及事縱使大兵旣集務速則彼或不來持久則我師先老恐終無以伐其深入之謀沮其方張

之勢公曰防邊之計莫危於戰莫安於守愚恐坐談不如親見自慶陽環縣延綏定邊寧夏花馬池與武清水營直抵寧州一帶邊牆城堡墩臺躬親閱視廣集衆思兼采羣策參酌損益始有定論其大要有曰修濬牆塹以固邊防增設衛所以壯邊兵經理寧夏以安內附整飭韋州以遏外侵當務之急莫先于此但陝西財匱民勞修邊之役人多異議然利害有輕重關係有大小大事可成則小費不足計遠効可圖則近怨不足恤此臣區區大馬一寸之忠也今之河套卽周之朔方漢之定襄赫連勃勃統萬城也唐張仁愿築三受降城置烽堠千八百所自是突厥不敢踰山牧馬朔方無寇歲省費億計減鎮兵數萬受降遠在河外古之舉大事者勞而後佚類如此受降據三面之險當千里之蔽正統以來浸失其險舍受降而衛東勝已失一面之險又掣東勝以就延綏則以一面之地遮千餘里之衝遂使河套沃壤爲虜甌脫巢穴其中深山大沙勢固在彼而寧夏外險反南備河北陝西北虜之患所以相尋而莫之能解也茲欲復守東勝因河爲固東接大同西接寧夏使河

套萬千里之地歸我耕牧開屯田數百萬用省內運不然則陝西用兵殆無虛日八郡之人疲于奔命民窮盜起禍將何極及今將延綏寧夏一帶邊防設法整飭賊來有以待之雖非上計猶逾于無策醜虜聞知或數十年未敢輕犯我得休養生息東勝之議未必終不可復也世之論邊事者或專主於戰伐臣亦非敢忘戰者方將蒐選官軍策勵將士修車馬備器械儲糧糧明斥埃今冬虜賊若復侵犯謹當督率諸將恭行天罰成功在天臣不敢必凡所當爲臣不敢避今首以築牆挑塹爲言宜必憎茲多口但受恩深重自當爲國遠圖今年套內無賊腹裏有秋人民稍安正可有爲之日應合經理邊防事宜條奏伏望聖明俯垂省覽時有人饒美珠一斗者公直受之嗣諸邊將謁請留侍左右詢邊事公隨出所受珠投之地以分犒之頃刻立盡門生有以貧歸者發囊助給率數十百金以爲常至嘉靖二十七年卒年七十八

蔣文定公冕以正德十一年入閣時武廟常游幸西北邊自稱威武大將軍鎮國公冕時病在告滿三月乃上書力諫上不宜自損威重下同

臣子所過諸侯王儻以大將軍禮見上安能督責之且睿皇帝棄羣臣陷虜非爲過幸也六軍私屬近三十萬禍且叵測如此上以單屬宿衛之兵經行虜地寧不寒心請究罪左右奸邪導引者語切甚不報吳廷舉陞兵部侍郎卽自劾因及公隨侍南狩之事公與面論曰爾謂冕有愧於古者四人其引韓愈諍臣論歐陽修與范司諫書意蓋欲冕隨事效忠未爲不善至朱熹與史浩書謂不如張禹孔光爾亦信冕之決不爲張禹孔光也獨陳瓘謂曾布以官爵牢籠移書論其過爾今入朝首疏論冕以示鄉曲朋友無私交之意正與瓘意同但曾布宋時宰相當時欲以朝廷官爵市私恩故陳瓘特論之今之內閣大學士不比古時宰相爾之陞官皆吏部會官推舉不與內閣相干誰敢以朝廷之官職市一己之私恩乎爾何不相諒也廷舉遂無言而去

翟文懿公鑿嘉靖丁亥三月內閣員缺廷推吳白樓等四人奉旨再推兩三員來看公列名第二卽蒙上點用遼菴楊公具揭仍用循資聖諭云用鑿者於狀爲學有益公之入相特膺簡用如此次日早奉手勅陞

吏部左侍郎兼翰林院學士內閣辦事於時遼菴楊公木齋謝公南塢賈公皆先朝耆舊與公同居揆席而公謹密凡一切章奏詳閱無少厭倦遼菴稱公曰吾觀先生悉心章疏朝廷有托矣頃之欽命文書官齎手勅一通銀圖書一顆其文曰清謹學士同時遼菴楊公羅峯張公見山桂公亦各有圖書之賜同事諸公時有密啓公獨無上嘗詰之公奏曰臣恭逢堯舜在上事體俱各穩當是以未敢有聞非敢怠忽也上嘗顧問羅峯張公某事莫知所本公告以出劉向說苑手自檢授張公嘆服曰公博物洽聞如探淵海非吾所及公每與羅峯公閣中議論不合姑置弗較徐伺其悟既而據理開陳得失且曰國事非一家私事公其察之至有稟擬將上改正者張公每爲之愧屈後公獨揆三月時機務盤錯公鎮以和靜斷以公平不動聲色百條承式上亦委心用之嘗擬陞西陲撫臣某人之上特召見文華殿面議可否既退復召見是日公凡三接天顏奏對明正剴切眞虞廷君臣都兪吁嘒之美又皇上尊奉聖母章聖皇太后構崇先殿特隆孝養既考厥成大陳法部卽日命

輔臣爲致語詩章以進上顧左右曰日晡矣其令速來公受旨援筆立就致語二上覽之嘉悅是後上元令節及瑞慶之辰上悉命公爲詞章每蒙眷獎時有恩賜又公奏賀有白鹿古風白兔詩白鶴頌靈雪歌甘露表黃河清頌類付史局公嘗與序菴李公奏對上前票擬某人之罪上欲重置于法公難之反覆諍論忤旨上震怒公叩謝復披瀝肝膽從容納約上察公忠實爲之霽容李公戰懼罔措退語人曰石門氣節吾今知之矣嘉靖十八年己亥二月聖駕大狩北虜犯邊徵擇可往者上起公充行邊使暫改兵部尙書兼都察院右都御史奉璽書符驗旗牌及賜飛魚服銀椰瓢三事等物前往九邊勞賞官軍經略邊務其總督鎮巡等官悉聽節制巡歷自宣府始悉將道途遠近事體繁簡扣算日程務使邊人實沾聖恩又欲速舉王命以紓皇上北顧之懷公所至宣諭欲將士知朝廷思念邊人戍役之苦故遣我重臣親賚重賞以勞之軍士有斬得敵首者公卽時厚賞趣題奏之宣府乃北門銷鑰兵分五路極爲重鎮兵馬錢糧詞訟甚是繁夥止有一僉事總之事多壅滯具

題添設參議一人上可其奏大同北路延袤數百里聲援不接每達賊大舉直抵城下駐牧殺掠罔知忌憚我軍無伏險之處任賊深入莫之敢櫻土地千百餘頃遂至荒棄公與總督宣大東塘毛公力築五堡以爲大同藩籬星羅棋布斥埃相望嗣是而後戍卒乘高望遠據險設奇實扼其吭賊望見輒引去雲中賴焉自花馬池登大邊巡至寧夏抵固原事竣將入甘肅總督鎮巡等官僉曰過此卽河西金城五郡番夷雜處中通一線之路往年有總督過虜之患可命代攝公卽誓衆曰鑿受朝廷心膂重託當以死報吾不親履其地沙漠孤寒將士何由仰識朝廷體悉至意吾敢愛此身耶卽刻戒行由莊浪涼州越甘肅直抵嘉峪關是關爲華夷之限一關卑隘旣無城池又極圯壞每土魯番犯順直至甘州鎮城殺掠人畜若蹈無人之境公閱視甚駭曰緩欲閉關絕貢亦不可行遂命肅州兵備具呈專宜奏聞得准修築恢拓堅固城垣歸然添設兵馬近年虜有犯甘肅者此關扞禦之功居多工完聖心嘉悅前公至西河聞土人云吾儕每聞頒詔給賞軍士引領翹望如在天上

今日朝廷念我邊人違闕老散賞百餘年來所未聞見也凡行賞賚公必會摠按等官當堂唱名目親給散間或摘取一二封袋親平重輕有司莫敢欺慢沙漠孤寒將士一旦得此豈止挾纊之溫哉還自嘉峪關歷金城關臨鞏西安過潼關渡黃河由山西保定直抵遵化永平出山海至廣寧適值叛卒甫平人心洶洶公至教場宣諭朝廷恩威解釋疑懼頒給犒賞軍士皆加額嵩呼人情始安事竣入關歷薊州沿邊及喜峯口燕河營太平寨馬蘭峪密雲等處閱視給賞謂摠按曰此處密邇神京尤爲緊要凡邊垣墩堡軍數糧餉圯壞缺少者急宜修築補給以備不虞慎勿虛應故事庶仰副朝廷責成之意公於邊計素所究心及巡邊于九塞關河險易士馬強弱糧餉虛實虜情出沒將吏勇怯咸在目中近歲以來邊警頗熾每奏報緊急軍情上遽以付公文書官守候票擬公倉卒批荅脗合軍機嘉靖二十三年以少傅謹身殿大學士爲民卒年七十詔復官

張文忠公孚敬嘉靖六年以禮書文淵閣大學士入闕八年放歸尋入

十年致仕本年復入十一年致仕十二年復入十四年致仕十六年再起不出卒年六十五公二十四而舉於鄉數上禮部不利歸而聚徒教授姚溪山中扁其讀書所曰羅峯書院人或謂公去諸生何幾而書院爲公笑曰諸生不當書院耶我胡以不當故自若而其所持論慷慨中竅旣遊於監司守相間毋能難之矣遂爲諸生祭酒成進士時上以興世子入繼大統下廷臣議所以尊崇獻皇帝及后者久之不決公官大理上書大略言上旣以興世子入繼武宗皇帝統非繼武宗嗣也今以後武宗則弟以後孝宗孝宗自有子奈何舍獻帝弗考而考孝宗使獻帝有子而無子上有父而無父哉上心是之而迫于輔臣禮官議報聞公亦去爲南京刑部主事乃下議議尊孝宗曰皇考獻帝曰本生父而公復上書爭之曰是二本也孝宗法得稱皇伯考不得稱考獻帝得稱考不得稱本生父因草或問二篇於是桂文襄公芻蕘亦上具如公指而中外士大夫側目而視公且齟之矣然天子益已心動而方公獻夫霍公輅輩益推緣公說而進之天子用以連杜輔臣禮官口凡三下詔

始定召公與桂公超拜翰林院學士公雖以驟顯重然猶不能容公卿
間而益侃侃自發舒亡所避上愈器之公念以書生片言當人主意非
久取相位思有所報効大要以破人臣之私交而離其黨一意奉公守
法卽怨謗弗恤也上嘗諭公留都天下首地而事皆中貴人專之何恃
也擇宗室一人留守便公言高皇帝以親王領宗正不久而罷之宗室
不預政久矣臣不敢奉詔自是乃數數言中貴人暴橫狀上爲悉裁革
鎮守監槍市舶之類後先殆盡公又自言禮起上以明聖述作爲任事
取公裁定若分祭天地北郊尋壇於東西爲朝日夕月正先師號易像
而主帝后行耕蠶禮皆其大者時昭聖皇太后於上有推立恩而上所
生章聖皇太后日重昭聖猶以故事裁之不爲下上不擇而昭聖之弟
昌國公張鶴齡建昌侯延齡者早倖橫燕中所爲多不法旣微知上指
恐揣甚而燕中少年亡賴蜂起爭持脅其金帛毋算後稍稍不能酬乃
上變言其詛魘怨望大逆殺人事下獄按皆誣獨延齡殺人頗有狀昭
聖迫乃因上後宮有他慶以延齡請上益怒遂欲坐延齡反族其家公

固以爲廷齡殺人抵償當而坐之反族不可夫廷齡財虜耳何以能反
凡數詰問具對如初乃論廷齡殺人罪屬秋盡當論公復與其僚方公
獻夫上疏謂昭聖太后春秋高卒聞廷齡死能不內傷痛乎萬一不食
有他故何以慰敬皇帝在天之靈上憲謂公自古強臣令君非一若今
愛死囚令我矣當自悔不從廷和耶廷和者初侍考敬皇帝相也上故
爲重語欲以惕止公公持不已乃下詔悉緩諸當論者而終公與太后
世延齡得長繫矣公在公車最久而其成進士僅六載而拜相天子之
所以禮信之者自明興無兩焉凡所創革典制雖上自信以天啓而得
之公者深矣公博洽典籍所撰對班班可據其以合非偶然也天下迫
于議禮而口非公者十之九忌公貴而刺之者十之九久而稱公是非
公者半公沒而思之者更十九矣當公沒未幾居第浸風雨力不能飭
子孫多假貸於人以食□□□公在內閣嘗請嚴私門之禁絕請托之
交疏云凡臣之所不爲皆彼之所不便也皇上試召吏部問之曰張孚
敬自入閣以來曾專主行取某官陞某官爲私人開伴門壞祖宗選法

否乎召戶部問之曰張孚敬自入閣以來曾專主濫引賣窩買窩爲奸商作盜賊主壞祖宗邊儲之法否乎召兵部問之曰張孚敬自入閣以來曾專主鑽求將官任某鎮某帥求將官任某營壞祖宗擇將之法否乎有一於此臣罪當誅也霍文敏公韜嘗與呂涇野書曰生敬羅峯者謂其一心忠于朝廷絕纖芥私也主張大禮不悚不懼明千古之謬伸聖主大孝一也辨明大獄救一家十數冤命破散蔽上之姦黨二也在閩九年未嘗容內臣私請政本清端三也十年不進一內官且革鎮守芟百餘年積弊四也吏兵二部推選文武官未嘗片言干預內官病故故例蔭義男義姪家童校尉三四十人羅峯削黜之盡五也宦官皆知警戒省郡有司在京大小官不敢肆濫六也革威詭濫官罷十八侯伯七也門無私謁夙弊盡絕八也三黜奔歸行囊惟一衣箱如寒素卑官九也在位日只用外甥一人亦才名不忝餘則絕纖芥私黨坦坦平平過皆可見心跡至明十也羅峯有此十善故敬之只見偏度狹終無他又云凡今之人附下罔上不足爲異獨賢者亦甘心焉羅峯在位無

一念不忠朝廷無一事不爲國無毫髮私身家人爭罾焉何也

呂文安公本初姓李嘉靖二十八年以少詹入闕庚戌秋八月虜薄郊關上御永壽宮召入直諸臣問方略公奏曰諸臣民仰望天顏久矣請亟出視朝安中外心旣則以郊堡僵尸瘡痍就死請亟下令掩骼埋骸發賑蠲租京營故多糜軍請亟更張以善後疏再入悉然納之咸寧侯仇鸞螫都御史商大節乃坐推避律比失機公上言此附律也卽罪在推避宜與臨敵殊科不聽旣又言鸞調邊兵入衛以其習戰足當虜鋒今奏自部營兵以距前茅分發邊兵于邊外以斷後殿臣所未論其意云何且督餉都御史隨地餉軍不爲不預鸞復要戶部載糴從征甚則秣馬許掠田禾恃之恃者也邊臣請互市廷臣持之上問輔臣云何公極言不可往虜猝入不及爲謀第一市以緩之固將集兵力大創之耳乃今兵力方集籍令虜入正宜張天討以振國威大羊無厭何示之弱也旨善之悉罷市議毋開端鸞敗誅癸丑徐邳大盜饑民輕爲邪上用公言命漕河二都御史并力疏濬發徐淮倉糧四萬石兩宮內帑銀五

萬兩遣刑部侍郎吳鵬出賑之既而河復淤請遣祭山川岳瀆之神水乃就下省臣建議請築外城則以時詘舉羸第自南關首事卽以一面經費三面可以類推上數問輔臣不四面非王制也於時諸執政及當事諸臣胥命工所公言城南民物蕃庶或生戎心城之便今旣城南面衝萬雉有奇自東西北折而屬都城傳諸堞計二十六里而近工可計日而成餘三面工胥後命天壽山水爲患衝蓄諸陵神路石橋有差上遣公視之特旨問狀公曰二水交衝故多潰決河勢環抱法中堪輿形勝不當更工費不當惜第濬河深廣下如建瓴可無患矣其年大同歲豐一緡幾得一石請發度支銀十五萬預糴以佐軍興較之年終可省三倍職方郎唐順之言邊事上問邊兵入衛起自何時公對曰祖宗四征不庭皆發京軍以往正德中江彬擁邊兵扈南狩蚤見者以爲不然自是邊兵果驕遂有大同之譟鸞受兵柄歲徵邊兵入衛京陵屬劄兵入關督臣始奏留二軍防守因循未撤遂以爲常清問及之計深遠矣時光祿寺歲多冒破上命舉較著者以聞公上言光祿故額二十四萬

歲贏其半或以佐司空乃今宮掖樽節有常歲費至三十六萬要之出入無藝其弊四端一傳取之弊一關文之弊一門禁之弊一磁器之弊請復舊制月遣一御史糾察而籍奏之尙方所需必授符必登籍以待歲會且法行自近臣等備員近臣常祿有供大官有糈復以在直日饗三飯請罷之上悉用其言日損再飯先是己酉莊敬太子立無何薨上諱言立儲言者見罪辛亥禮臣疏請公奉旨陳言自古帝王莫不蚤建太子將以正國本繫人心祖宗以來太子諸王年十五以上則冠婚出閣第本支異禮必先正名且天授元良不可以往事概論不納壬子春裕王始冠命公贊冠明年請二王就宮中婚上問故公對曰名分未正不宜並出而婚耦則上疑軋則下貳且先朝同在宮禁有太后有中宮有東宮今陛下骨肉親惟二王耳悉出居外獨奈何卒不納明年復請寢如初庚申故左中允郭希顏上書謬以建帝立儲爲發語上大怒傳上刑公上言小臣妄言建帝罪當死但二王同居分邸寓內莫測淵衷其在天倫則聖心密定久矣徒以己酉爲鑒篤愛元良誠如所言一留

京一之國人心自定寧詎以人廢言上心然之卽諭輔臣景王當遵祖制令之國卒之翊穆考開太平公誠社稷臣也庚戌進士賜宴南宮禮官則以輔臣貴重而品在三以位次請分宜擬公居三品之上弗從既則擬以品爲差上徑命之居二品未得上坐華亭入相後公者四年公引身下遂躡公上其後上尊華求舊擁格亦猶分宜司隸擁公孤諸柄臣其在肺腑公雖多息竟謝之及司隸暴亡周親內卻公無所預概諸唐虞之揖讓不然乎哉先是島夷弄兵諸郡縣盡城守餘姚故城江北公紹介所部請夾江而城有如通州淮安臨清犄角相守均之赤子寧詎置之度外耶侏者以爲譁不用命公謝曰吾未奉君命而興大役譁固當屬江南諸有位者上書下司空議旣得請則胡公宗憲董其成迄告成功民不知役於是人人頌公功德祠事龍山公旣家食察民間大不便者言之有司請屢畝請均糧旣則徵徭銀罷優免由是租庸有調民力以紓直指使其狀上之絮爲令嘉靖四十年以少傅武英殿大學士丁憂改姓呂卒年八十四

徐文貞公階嘉靖三十一年入內閣公爲編修日上好更定禮制欲純孔子王號去像爲木主於籩豆禮樂皆有所抑損首揆張孚敬緣上指而發之下儒臣議相顧憚讐亡異同者公獨陳其三不必五不可狀甚辨疏上報聞孚敬坐朝堂召公盛氣語之公徐理前說且曰高皇帝盡革嶽瀆號而獨不革孔子者何也孚敬遜曰高皇帝少時作何可據公曰高帝定天下而後議禮寧少耶果爾明公之議四郊何以力據高帝少作孚敬頰盡赤曰爾謂塑像應古禮不公曰塑像非古然旣已肖而師事之何忍毀也孚敬曰程氏不云乎一毫髮不似吾親可以親名之乎公曰有一毫髮而似吾親毀諸可乎且明公能盡必列聖之御容無毫髮不似乎哉卽何以處之孚敬語塞怒曰若叛我公正色曰叛者生於附者也階故未嘗附明公何得言叛長揖出於是上亦緣孚敬意爲或問以難公而斥之外爲延平府推官遷黃州府同知歷浙江僉事提督學校久之乃擢禮部右侍郎改吏部兼學士與閣臣張治李本同直無逸殿時虜闖入塞遂薄都城公疏請擇邊將之在司敗獄者戴綸歐

陽安等詣行營自効報可已又請上還大內亟召羣臣計兵事上雖褒公忠愛而尙難還內召見羣臣內閣推公督視九門公亦慷慨請行上倚公以自安故特用其副侍郎王邦瑞而申諭意焉會有中涓陷虜歸者以虜求貢書至叩云不許我則進兵上以示公及嚴嵩等且召對便殿上謂且奈何嵩猶爲緩語曰飢賊耳不足患公曰薄城而軍殺人若刈管何謂飢賊上曰然復問求貢書安在嵩出諸袖曰禮部事也上復問公公曰賊重且深矣不許恐激之怒許則彼逞而厚要我上曰苟利社稷珠玉皮幣何愛焉公曰要有重于珠玉皮幣者陛下能許之否上悚然曰卿策之遠雖然當何處公曰請計緩之上曰何謂緩公曰請遣譯者至虜所詰之以用中國書而無番文且徵其情實實則許之貢而責其暫出邊我得以益修備而援兵益集虜且走不走而擊其情歸可十全上稱善者再嵩乃進曰上幸一出視朝上不答公與李公本從史之上曰可爾得無驟乎公曰虜鴟張甚中外方洶洶恃陛下而重得一蹙聲若大旱之得雷霆胡驟也上始首肯陛下出而會廷臣議皆言求貢

非虜本情不宜示中國弱公因兼酌所以面請者疏上而上果視朝申
飭中外責數當事有甚厲非所望也虜尋以飽去乃下公疏弗許貢公
因薦故按察副使聶豹都御史何棟才卽召用之又陳善後數策皆報
可初孝烈皇后崩上欲祔之廟而念壓於先考潔皇后又睿考入太廟
非中外公論恐于千秋萬歲後所祔主或非仁宗而睿考遂下公定議
欲以孝烈先祔公公合諸大臣議朝堂大約以女后爲先入廟者請祀之
奉先殿諸公相顧莫敢應獨禮科都給事中楊思忠以爲然疏上上大
怒謂公與思忠專之足矣何諸臣爲令再議公不獲已乃小婉其詞以
爲太廟九室皆滿若以今上論仁宗固在所當祔第此乃他日聖子神
孫之事而仰煩皇上身自議之臣等愈有不安于心者夫夏廟五商廟
七周廟九今更遞益之於太廟奉先殿各增二室而升祔孝烈皇后則
仁宗不必祔而孝烈可速祔上難於增二廟謂公故設難以阻之愈怒
促更議祔仁宗祔孝烈所以督責公甚峻公惶恐謝罪不獲終守前議
時咸寧侯仇鸞方言邊事有殊寵與公共直舍東西屋杯酒小醜嵩益

惡忌公鸞時利屬國虜朵顏弱欲掩以爲功謂其實導虜請大發兵征之下禮兵二部議公曰征之易耳一征而永撤我百八十年之藩籬且侯鸞所云導掩答者卽得之俺答所夫焉知俺答之不利其土沃而假手我也我得其地不能成將毋爲虜外圍何僉事趙時春以山東募卒入衛頌精侯鸞惡而欲併之每言時春暴且怨望流言漸狎聞公挾緹騎帥陸炳出精師所以慰諭有加歸以語中貴人麥福俾婉曲白之上乃弗果併鸞自是不悅公然方與嵩角弗暇也而會有獲間功上復下公及兵部議鸞嵩俱獲峻加且延世而僅錄公一子入監上手注加少保尋進兼文淵閣大學士參預機務始侯鸞自詭以必大破虜得上要契眷寵亡兩而其後言益不鮮願益綏肆要請無已上頗心厭之然中外猶畏其焰亡敢及者會鸞疽發背不能將虜警咨至尙護昔不肯吐大將軍印公密言其不可恃乞蚤更置將上歎而答曰吾非不知之欲甚彼所爲耳迺因兵部以馳使奪其印鸞一夕自恨死死之五日而事敗妻子墜於市家盡籍嵩之始見仇鸞敗謂公同直舍將以是媒之而

知自公發而奪印中夜扶牀行咄咄曰吾長於階二紀而智何少也自是謀稍息矣上既誅鸞益親重公數與謀邊事時議減入衛卒以侯鸞嘗益之故公請毋懲咽而廢食今大同殘而內邊弱入衛卒不可減也又言京營所以積弱之故不在乏而在冗宜精汰之取其廩以資賞費又請罷提督侍郎孫禮上始格於嵩不盡雖久而皆用之是時倭事起上以所蹂躪多公卿公曉暢軍事以故數數詢問時撫按亟告急請兵職方郎謂兵發則倭已去誰任其費尙書惑之公持不可乃以贏卒三千人往公上疏爭之曰江南腹心地也捐以共賊久矣今據撫按奏報或云來者未已或云意不在搶而在擾勢不欲去而欲留彼皆真有以驗之而部臣於千里外乃能踰度賊之必去又踰度其去而必不來而阻援兵不發置此腹心地於度外臣所不能解也夫用兵之道當計發與不當發耳不當發則無論精弱皆不發以省費當發則必發精者以取勝而奈何用虛文塗耳目置此三千贏卒與數萬金之費而餒賊臣又所不能解也尙書乃懼請卒六千人俾偏將軍許國李逢時將焉國

已老逢時敢深入而疎驟擊倭勝之前遇伏潰當事者方以發兵爲公咎冀因以搖公公復上疏謂法當責將校戰而守令守今將校一不利輒坐死而守令偃然自如及城潰矣將校復坐死而守令復僅在降此何以勸懲也夫能使民者守令也今爲兵者一而民者百奈何以戰守併責將校也夫守令勤則奸伏必不容守令果則探哨必不誤守令警則奸細必不容守令仁則鄉兵必爲用臣以爲重責守令可也報可會虜移庭枚宣大宣大與虜雜居士卒不得耕種米麥每石直至重金三兩而所給月糧僅七鍰半菽且不繼時畿內二麥熟石正值四鍰可及時收買數十萬石石費五鍰可出居庸抵宣府費八鍰可出紫荆抵大同大約合計之費中金一兩而土率可飽一月食其地米麥當亦漸平具疏上上大悅令密傳諭行之上所居永壽宮災徙居玉熙殿隘甚以問嚴嵩嵩乃請上徙南城上不憚更問公公曰上今居玉熙猶露宿耳臣子何忍安枕請策之今者楚蜀甫息肩不可復困令伐材即伐材亦不可以歲月計而時方營三殿有餘材其小而不中程者以當永壽則

尙鉅請以貴司空雷禮可計月而就上悅如公議而命公之子尙黃丞璠兼工部主事同閱視上復自玉熙徙居玄都殿聞京師內外多盜意恐欲以大營兵入衛公謂外兵衛宮禁非便請以錦衣緹卒衛玄都而營兵列宮城外爲儲胥以相屏蔽報可新宮成上卽日徙居之命曰萬壽宮時公論邊將則薦故遼帥楊照與偏將馬芳董一奎之材勇上卽爲擢用論有司失職則言吏部不當徇賄囑上卽爲罷歐陽尙書而拔郭樸代之論選庶吉士請賜御題以防泄竊嚴調察以防挾遞上卽爲罷選於是中外喁喁覘上意所左右謂治有機矣居久之上雖以御史言去嵩然念其供奉玄久憐之而左右入其間者從容言非嚴嵩誰爲上奉玄上忽忽不樂手諭公及次輔袁煒欲退奉專玄如法傳嗣治安天下令擬詔行公等謝不敢而吏禮二部奏遷鄒應龍通政參議得旨矣忽復奉諭貴公等不擬詔而謂二部臣皆奉贊者何一旦官此邪物公復言退而傳嗣非獨臣等不敢聞命天下皆不敢以爲然邪物之轉二部奉旨而後行之臣不敢傳亦不敢泄不報時應龍內危甚謀于公

公曰第之任有某在毋慮也已而上不欲公久直曰無以杜兒輩姦公謂陸博走馬使酒狹邪爲姦長安中者不在外弗杜也甘言比周相合而爲姦於朝堂則在內猶外也上悟輟分宜直廬以賜公中外人情大安於是公始爲政書三語懸之直廬朝房壁曰以威福還主上以政務還諸司以用舍刑賞還公論於是公卿大夫咸侃侃冀行意矣會袁公煒數出直公請以時邀至直所同擬旨上不可公謂事同衆則公公則百美基專己則私私則百弊生乃從之時給事御史以抨擊鉤黨責閣臣過當上覺而惡之再下公欲有所行遣公委曲調劑得輕論上問公知人之難公對曰大姦似忠大詐似信自古記之知人則哲唯帝其難念欲有以易其難者惟廣聽納而已廣聽納則窮兇極惡人爲我櫻之深情隱慝人爲我發之未用者不濫進矣已用者不濫留矣故聖帝明王有言必察事大而言實者行之其不實者小則置之小則薄責而容之以鼓來者上稱善良久自是於白簡所封進卽小忤弗深治而言路恃彊益發舒矣戶部歲請御史糴粟宣大公謂巡按權重于糴粟御史

而熱宣大事且可以時低昂其直遂歸之巡按工部請開例而議及贖
緩公謂贖緩例以濟邊市穀者今一切充筐篚宜嚴禁兵興日餉益增
民益困今寇漸輕矣宜裁省逋額不分歲而徵將何所措手足宜以緩
急爲限皆用詔旨行之民稍蘇伊王坐法錮祖陵貲當籍故事籍貲者
悉入內帑公示意撫按俾部禁物應格而餘金錢三之二以一充邊用
一補宗藩之祿不給者廣大寇張建平上以運籌策歸公公力辭僅
領下賞念以曩者夏言執政內閣臣始預邊功賞以至嚴嵩重則加公
孤錄子孫輕亦兼金重幣敗不與其罰欲自解則先附玄威以中上意
而將士效百死取功名於鋒鏑者肆爲稽緩以要之於奏功疏擬上云
軍功論賞非實在信地戰守者不得與其將士功次立限速勘以聞內
閣臣自是不復預邊功賞矣虜後繇牆子嶺闖入直趣通州報至公草
勅命大將侯顧寰等爲九營營九門外文武大臣英國公張濬等巡視
九門內緹騎帥朱希孝帥其腹心將校往來干陬以故中外心稍定而
上方有祠釐斷章奏兵部尙書楊博得警急不敢奏而謀之公以便宜

檄宣府帥馬芳宣大督臣江東各兵入援芳兵先至公請於上亟賞之
又請重江公權俾諸道兵俱屬焉虜阻白河水從通掠香河上令看詳
楊博疏公請亟先備順義而以奇兵邀之古北口虜果趣順義不得入
乃走古北口其後軍遇參將郭琥伏而敗頗得其所鹵人畜輜重始上
以尚書博不蚤聞與總督楊選之不能却虜而任之入也怒甚俱欲有
所處分而未發公念能爲縣官任重曉暢邊事者毋如博卽一旦失之
緩急何恃且博與選不能兩全乃備言博雖以景命祠釐禁不敢疏聞
而二鎮兵皆其所先檄者上復問選今尾賊能擊之否公言非尾賊乃
送之出境也上以是益怒選竟誅之而不罪博公請收戰士骨瘞以大
塚具十中牢爲文祭之明年虜復窺黃土嶺及一片石公又請城張家
灣城成與通相聯絡爲重大學士袁公煒故公門生也躁而驕頗欲以
氣凌公上公故柔之時握其手曰公命世才也非公誰可與計天下者
煒以故益攘臂公卿間亡所憚而其俱爲承天大志總裁諸學士意不
平以語公公第曰任之而已會煒以久疾失上權請急而歸卒於道得

中謚曰文榮而還志稿於學士盡去其所竄改亡一存者人頗亦快煒而徵皆公之薄公狃戲謂人吾爲尉則畏守爲守則畏尉如古快吏何得無爲彼笑煒旣歸道死公獨當國內不自安數上疏請增置輔臣而上數難之大意以公孤忠且才足專任公乃密疏乞休謂曩時閣臣居首者以不時請骸骨入主亦以不時去留故不得攘此位爲私物而恩威常出於上此例也上曰而亦徇例耶夫而自爲計美矣非所以爲君爲國之義也今惟有增置二員同汝輔政足耳公踟躕言臣雖庸寧不知天恩之與聖知若此而忍負之所以欲久用首臣者稿爲主權國政計俾恩威常在上而紀綱法度不至爲久而專者所攘耳於是公緣上旨復請益二輔而上復難之公言臣不敢避難願衰轉甚矣內閣事體繁卽開敏者非假以歲月不易周悉萬一旦夕之間渣先朝露卽有繼者何所取裁夫人才須作養於一二年之間而取用數十年之後今以爲可卽可以爲未可恐未以數月就也上自是與公謀進尙書吏部嚴訥禮部李春芳入內閣而起故吏部尙書郭樸於憂俟滿代嚴訥郭樸

者公所薦也隆慶三年以少師致仕卒年八十一公當穆廟時言路氣益張上時有所不堪上諭公等科道官不諳事體敢屢欺言是何意卿等詳處來說公草奏言科道官遭際昌時思効報答第性氣粗率則言或過當事出風聞則語或失實其不諳事體誠有之然天威在上以臣等度之非敢爲冒犯也謹錄申聖諭令彼各省改以仰承皇上天地寬容之德草具而有同列尼公者奈何不薄譴之公曰卽上遽有譴我曹且力爭而乃導之譴乎則曰如上諭詳處何公曰今諭令省改卽處也及疏上上亦竟弗罪也時有御史李惟觀上疏請毋得詰言者以廣忠益公擬旨報聞上以筆乙之而給事中馮成能復推其意爲疏語婉而加詳同列謂公將無復作報聞乙乎公擬答曰聽諫乃朕素心卽善言未嘗不嘉納昨諭乃爲不諳事體者若等自今宜審所言以稱朕意同列皆難之公曰彼已氏者不難言而我乃難擬也昨所以乙者正謂未有以開上意耳有不可吾請自當之乃擬上上果不異而時有一邑丞王邦直者條奏時務頗剴切公擬旨稱其多切時弊該部爲看詳毋以

官卑廢言于是人人稱頌君明臣直海中丞瑞者爲戶部主事上疏極言上過失他所以譏諷公亦不少上恚甚逮置詔獄欲殺之且諭公避瑞公謂主聖則臣直瑞固慧然不過仰恃聖明在上亦沾直諫名耳殺之則成其名容之則益見聖德之廣上始抵公疏地已徐取讀之已又取瑞疏讀之得毋死當是時以海君能觸上上能不殺海君爲異然亡能名公者今具見世經掌集中上偶不豫時穆宗在裕邸而有誤傳上晏駕者承奉李芳得之使使訪公公驚語曰誰爲若言上故無恙殿下分則臣也親則子也此豈吉事而可報者爲我謝李君一輕動立取大法且上累殿下芳悟乃杜門不納傳者又二十餘日而上大漸遂崩胡應嘉者吏科都給事中也故不悅于新鄭公前是誤傳世宗晏駕時諸入直者爭移其直廬書籍器用以出公獨不動應嘉緣是而劾新鄭謂其蓄二心賴上病曠不問新鄭以是恨應嘉刺骨會吏部都察院考察庶僚已得旨矣應嘉乃復論救給事中鄭欽御史胡維新新鄭之鄉哀時在事合而擬旨謫應嘉爲編氓公惜應嘉罪不至編氓而一時弗能

救諸給事御史合疏請留應嘉而他給事遂有論糾新鄭者公乃具疏謂論救考察非體臣等所以擬斥應嘉給事御史謂宜開言路廣德意所以請留應嘉臣等欲守初說則涉違衆而無以彰陛下恩欲從所奏則涉徇人而不能持陛下法思兩擬旨以進乃薄應嘉罪改從外謫當公上疏候數月慎擇乃可時新鄭之鄉衰復與公力爭至失色稍稍聞外言路之攻新鄭者屢上因相激爲詈其傳致公益堅而移仇者亦遂顯矣公嘗從容語新鄭人主之尊能以謫斥威言者不已而至杖杖不已而至戍且長繫成長繫不已而至儻然竟不能杜其口有如海君者吾曹人臣寧可以力勝新鄭益不悅上嘗賜階玉帶而侑以中金一錠曰爲帶資又擇綉蟒衣有珠者令衣以入公嘗病嗽上遣御醫診視賞賜如例復出自御珍劑二甌手書方以賜慰諭諄懇如家人父子而公益自斂畏居第成不敢援張夏輩例以請名額公旣用恭敬不衰上或有所委使通夕不敢假寐應制之文沓至促應有諸少年所難者未嘗逾頃刻期人以謂公公歎曰君天也父也吾敢易之吾豈不知愧諸少

年計以得上意而後可有爲于天下夫欲爲一己名不難誰與上共天下者上果益愛公又時時采外議公以是益重所論建裨益亡間公既日以寬大廣上意又能鉤物情不自崇重竿尺往復有吐必盡征鎮大臣咸懼於不敢隱而快于得自盡故公在政地大約緹騎逮省減十九廷尉若屬無所用深文雖其宛曲劑解之力多亦以意發舒少債事故也公于他量情罪多所縱舍而獨馭貪酷吏嚴所坐獄必竟不少貸且杜于請絕苞苴卽長安公卿邸中俱肅然亡敢以筐篚出入者大計捧賀寮吏皆有餘資歸老吏白首相驚咤以爲創見無有一時稱之

嚴文靖公訥嘉靖四十四年入閣初授編修再同考會試其所得多名士垂九載當遷而同年中一檢討其資與公埒得幸首揆首揆欲偕遷之俾公並主都畿試公不欲與共事因上疏請告省侍封公太夫人首揆覺而逆謂之曰守吏官寂寂踰十年且久侍從乃薄之耶且吾聞二尊健七箸公謝曰宦廢溫清心搖搖若懸旌胡能抑也今奉職亡狀幸不卽書殿得事相公有日非晚首揆色變然亡以難公遂獲請而一給

事論劾檢討罷之矣後爲吏部尙書徐文貞公亟爲上推轂公遂大拜
公公乃進九卿百執事於待漏院而語之曰諸公以國是誨不穀者以
不穀愆見誨者止此此不穀拜誨地也卽私第不足以辱諸公跡歸而
刺中廚置穀酒十餘几若晏客者然亡所召典客竊怪之旣而悉呼家
人大小前卽觴觴焉咸錯愕不知所以公徐曰吾以一書生受上知至
此分不當負國若曹一書生蒼頭從我至此分亦不當見負吾所以觴
若曹且與若曹約朝夕共漿炙掃除而已此外皆若曹食息地也若負
我必不汝貸家人叩首感謝而公願推擇謹厚吏使司門杜曰外跡毋
入內跡毋出蓋門之雀可羅矣一郡守不悉公束約蒼頭踵門投刺公
執而繫治之以諫殿下移其守亡他請囑也曰吾寧寃此守不能自廢
束約行徐復之於是中外之苞苴絕矣

李文定公春芳嘉靖四十四年與嚴公訥同入內閣先是有詔命公授
書中貴人故事多文具公以此輩日侍上左右而情游懈慢漸以成習
卽一旦管事奈何乃爲瑣細科條教督之於是皆留聽承學掖庭永卷

一時煥然會徐文貞公有事山陵公以少保入直有旨重建翔鳳樓公遂極言土木之費終先皇之世海內騷然今朝政方新宜與百姓更始而駿尋大興天下謂何上改容謝之終不復言營作之事矣是秋虜騎突入宣大間不及請公曰羸粮躍馬所以從時今事在緩急奚暇復請乃悉出前後所賜委諸將若第破敵上功當賞陛下不薄汝也乃皆感激泣下無不一當百追奔逐北斬獲無算虜既不得逞相率北徙遠斥堠諸將欲因深入擣其窟穴公以爲開邊啓釁不便而把漢那吉獨以勢窮單騎來奔把漢那吉者虜酋噲達愛孫也噲達索之急不得要領願歸亡納款貢市稱臣朝廷下其議公卿大臣廷辯不決或言從之便或言勿從公徐曰從之是也人但知漢唐和戎之失而不知今日和戎之利且漢唐與虜婚今納款稱臣體統正而名號尊矣漢唐制和在夷狄今制和在中國因其請而聽之彼喜于得請德我必深爲盟益堅虜以貢爲名我以貨爲市計數十年之市孰與一旦用兵之費况虜志在得請不得已抱無益之空質啓無窮之釁端則從虜爲懷柔拒虜爲

失計矣或言夷情叵測安知不以此嘗我萬一敗盟將何所責公曰以守爲戰其機在我權有所制又安所用其嘗又安所用其敗乎于是上從其議虜因受我符冊拜我王號歸我遁俘廟獻而市戮之一時傳誦稱快邊陲安堵幾二十年隆慶五年以少師致仕卒年七十五公居常恂恂言不出口至其臨大議引當否則介然不可奪其爲政務寬和鎮靜未嘗侵諸曹職守親故知交一無所私或引崔祐甫諷公公笑曰其人誠實耶何所容吾私非其人是重吾過也

高文襄公拱嘉靖四十五年三月入內閣龍馭上賓華亭公於袖中出草詔欲以遺命盡反先政公以語太峻與安陽公對案相面曰先帝英主四十五年所行非盡不善也今上親子非他人也三十登庸非幼小也乃明於上前揚先帝之罪以示天下如先帝何且醜事先帝幾欲止矣紫皇殿事誰爲之而皆爲先帝罪乎土木之事一丈一尺皆彼父子視方略而盡爲先帝罪乎詭隨於生前而詆訾于身後吾不忍也相視淚下語稍聞外廷而忌者側目矣會上改元閣臣四人各擬二字上上

竟號隆慶則公疑也人謂上意在公又議登極賞軍事公曰祖宗無此自正統元年始也先帝以親藩入繼時尙殷富遂倍之今第如正統事行則四百萬之中可省二百萬矣當事者竟如嘉靖行事而司農苦不支乃悔不從公會有言大臣某者其人實有望不當撤去而首揆重建言者意乃以揭請上裁公曰此端不可開先帝歷年多通達國體故請上裁今上卽位甫數日安得遍知羣下臣否而使上自裁上或難于裁有所旁寄天下事去矣乃竟請上裁兩人嫌益開言者爭謂公擅矣公初在政府無大異而三月之間言者受風指論公三十餘疏公亦力請去疏凡十二故事考察拾遺不及閭臣而南給事岑用賓御史尹校遂以公拾遺公自念非請病無以謝人言隆慶元年以少傅武英殿學士養病力求去上驚問左右曰高先生病耶左右對曰病甚上猶弗忍良久得請賜馳驛遣行人護送賜賚有加越一載上思公不置隆慶四年詔還內閣兼理吏部事公至慨然以天下爲己任時北虜頻年入犯中外以兵事爲憂公曰大司馬安危所係至重也不得其人由儲之不預

少司馬止二員此無事時耳閱邊事未免假于他官或遇總督乏人未免移于他處假他官則非本職不便行事移他處則補于東缺于西彼此候代動經歲時不得履任門庭誰禦請於兵部增侍郎二員一遇巡閱卽以一人往邊方員缺卽以一人往凡邊方險隘虜情緩急將領賢否士馬強弱皆已曉暢方略素定遇大司馬員缺卽以補之如此而稱乏用必不然也兵乃專門之學儲養本兵大臣當自司屬始兵部司屬職在軍旅而不擇其人泛然以用又往往遷爲他官今宜時高其選而以有智謀才力者充之使其專官於此不復他遷如邊方兵備卽以司屬往邊方撫臣卽以兵備往邊方總督卽以撫臣往而總督與在部侍郎時出時入以候尙書之缺如此而稱乏用必不然也邊方之臣又宜特示優厚使其功名常在人先他官不得與之論年月脫或不稱則律以法使其功名常在人後如是而猶不盡力必不然也邊關總督之臣在邊日久著有成績當令回署以休暇之後不妨再出使其精神不疲而智慧不竭以勤王事爲濟必多得旨報可已又上疏曰方今邊徼用

兵惟是薊遼宣大延綏寧夏甘肅而南則閩廣是數處擇知兵事者一
二人使爲兵屬彼有身家之慮凡山川險易將領賢否奏報虛實功罪
眞僞可一問而得請以是爲參伍之資得旨報可著爲令甲已又上疏
曰臣惟邊方有司有疆場之責才者猶懼不堪卽優禮而鼓舞之猶恐
不振乃官其地者非雜流則遷謫待之旣薄志意隳阻又何望于展布
蓋徒以地苦其人而曾不顧人之苦其地也徒以邊方爲遠而不知遠
安然後近安也請擇年力精強才氣超邁兼通武事者調用有能保惠
困窮俾皆樂業者以三年爲率比內地超等陞遷有能捍患禦敵者以
軍功論不次擢用卽由此爲兵備爲巡撫爲總督無不可惟以治效不
以資格功名之路旣開則又有借口邊方以圖倖進者不可不爲一定
之說薊遼則昌平順義密雲懷柔薊州玉田豐潤遵化平谷遷安撫寧
昌黎樂亭延慶永寧保安安樂山西則河曲臨縣忻州崞縣代州五臺
繁峙定襄寧鄉苛嵐嵐縣興縣靜樂保德大同懷仁渾源應州山陰朔
州馬邑蔚州廣靈廣昌靈丘陝西則固原靜寧隆德安定會寧蘭州環

縣安塞安定保安清澗綏德米脂葭州吳堡神木府谷其他不得概以邊稱得旨報可時虜甚警朝臣無經戰者人心震恐公乃以尚書陳希學曾邦輔侍郎王遴各率師背城列陣以待以京尹栗永祿爲都御史護守山陵又起都御史劉燾於天津守通糧而以總督王崇古譚綸專征勦無內顧以侍郎戴才理餉是歲也虜竟不入霜降獄獄故事府部皆在冢宰當執筆至是公攝吏部大司寇意公閣臣不屑往公曰上命我視吏部部事皆吾事也第須得情耳不至如往年間法司故牘唯唯也于是秉燭視獄詞漏盡不休晝則集諸司議於朝房凡二十日往歲矜疑不越三四十人至是出冤獄一百三十有九人往大計時詮曹祇問藩臬爲黜陟公多所參伍或衆否獨留衆可獨黜其黜者必告以故無不惛服稱神明謂前此未有也已又策天下有司曰各地方有何賢才尙隱淪有何兇頑尙梗化有何利當興何所沮而弗興何害當革何所畏而不革皆得言之令封議以告天下事皆在目中矣時天下重制科輕科貢公曰天下制科處其三科貢處其七是崇其二而棄其七也

乃疏請惟賢是視不計科貢除吏時其善地多留而不除名曰養缺公曰民方無主吾何以留爲祇留以供用且以供人之用耳吾無所用又不供人用則何留焉于是命選司凡所有缺悉揭諸門外使衆見之故事推陞時皆主事揭授郎中呈於冢宰公曰堂有侍郎司有員外疏皆列名而事不與聞何居此不過欲行其私耳吾其改是令吏抱牘至後堂一侍郎同所屬揭之卽冢宰欲有所上下不能也鹽馬之官暨遠方府守人皆薄視之以故善政無聞請以賢者往不得復有低昂積穀遇貧薄之區則何以取盈完糧當苦寒之地則何以足數於是將寬其額而官不苦難教官暨驛遞閘壩等官本無民社而竟處以他省遠方使有官者不能赴而去官者不得歸乃請得選本省人皆稱便它如開王親內轉之列覆一甲讀書之規正撫按舉劾之差覈京官考滿之實分進士講律之會定王官陞授之條議有司捕鹽之格遂使朝無偏黨官無煩苛九州四海雷動風行矣先是貴州撫臣白土官安國亨叛逆當勦久而不克公復偵知國亨非叛而巡撫者輕聽讒而倖功也乃以少

卿阮文中往受計行阮至貴得實如公言然狙于浮議語多依違公復之書曰民夷異類順逆殊途稍有釁隙當自處分不可過言於君父之前君父威在必伸一有叛逆便當撲滅可但已乎事非其真過言之則將何以處也安國亨安智夷族自相讎殺何謂叛逆而撫臣以告國亨禍不測且圖苟全有司不原其情激而成變卽以爲叛逆之證可恨也國亨上疏乞哀叛逆者若是耶有司仍以叛逆論之遂使朝廷欲開釋而無由國亨欲投順而無路且智國亨雖也智在省則國亨疑畏日深是挑之使鬪而增吾多事也愚謂國亨有罪而不可輕言叛逆安智當有安置而不可省居時彼中號令未明國亨疑畏不肯赴理聲言撫臣以勸誘我殺我乃擁兵自衛於是撫臣上疏請兵糧爲征勦計公曰噓誤矣國亨不出者疑畏深也處以叛逆彼將叛逆自爲也彼夷酋耳族滅何爲時在閭思之旋牀而走同官者曰公何旋牀走公曰思貴州事耳從之則非計不從則失威今撫臣疏請征勦而國亨亦奏辨吾意兩行之而以一科臣往勸彼聞勸官且至以身旣在勸當不敢殺我我出

聽理乃可以自明而乃治其本罪亂或可戢也胥曰善公召職方郎中至授意遂得請而以科臣賈三近往公復面授方略乃國亨聞科臣且來果喜曰吾生矣吾豈叛逆者哉語達京師先是既約以無事而國亨母子狐疑不出至是乃將漢夷犯人王寬吳瓊阿第輩獻出而母子出就理輸銀四萬一千有奇抵罪蓋科臣未至而事已定矣故黔國公沐朝弼既謝事請入南京赴葬撫按奏曰沐昌祚政事清明以致歲豐朝弼逼走昌祚不知所往請將朝弼緝南京毋令回鎮兵部來問計公曰誤矣雲南守巡故以挫沐爲丰采今又其故智耳領鎮之人衆所寓目而謂不知所往昌祚孺子耳安能感動天地朝弼安所爲惡如有罪朝廷以檻車逮之如之何其賺之令歸耳後數日昌祚奏至請還其父且言撫按所奏誣也廷臣益信公神明北虜俺答孫把漢那吉來降邊報至中朝人心洶洶罔知所措公曰是奚足懼願老酋愛其孫耳繼報者至曰酋婦甚愛其孫而老酋甚懼其婦泣欲得孫矣公曰虜敢擁兵來索吾必殺之令退去虜果退去公請加那吉指揮使賚以章服又語邊

臣令盛其騶從騎馬街行使衆見之老酋初意中國殺之也乃聞不殺又加以官又美衣食騎馬街行大過望而又知不可得於是公請下令獻我叛人趙全等以贖其孫奄酋果以計招全等等皆中國人而爲虜用居板升領衆數萬所居左曰鳳閣右曰蟾宮門曰宣化牆屋皆繪龍鳳往歲破城殺吏皆其所爲也世皇懸重賞購之得其一爵通侯然竟不可得公乃請許那吉歸又令邊臣以緋袍金帶鶴蓋鼓吹送之又宣諭俺答曰那吉是我中國臣若善視之老酋夫婦既喜得孫而又見其榮寵南向取胡帽叩首呼萬歲而封貢事之議起矣趙全等等至公親請射所面質全等等全果驍鷲異常其次李自馨者諸生也凡數十年不能了者全一言而畢公因問虜今歲不入故全曰虜豈能不畏死哉偵是處有兵是處有糧人有鬪志不敢入耳遂收獄盡陳于市全等顧其屬九人曰吾屬被擒邊事寧矣至封貢事虜哀求日懇而中朝疑畏日深盈庭之議有如鼎沸動以宋人講和爲辭公曰天下之事以己求人機在人以人求己機在己宋人求和於虜機在虜故曰講今虜求貢于

我機在我直許之而已彼曉曉者豈爲國籌利害哉徒念重大恐有不效留爲後言耳乃請封俺答爲順義王其餘都督指揮千百戶有差而套虜吉能等亦請願如例而三邊總督難之公擬旨切責復貽之書二邊宣大似難異同異則宣大之市方開而三邊之擾如故豈無俺答之人稱吉能而擾三邊者乎亦豈無吉能之稱俺答而市宣大者乎是宣大有市而又擾也三邊苦擾而實市也同則兩利異則兩壞總督者議始協于是俺答進馬謝恩吉能亦附焉而西北沿邊一帶民狎其野稽人成功雖深夜獨行無誰何者矣于是公上疏曰嘉靖十九年北虜遣使求貢不過貪賞資與互市之利耳邊吏倉卒不知所策當事之臣憚于主計直却其請斬使絕之以致黠虜怨憤擁衆大舉此往歲失計之明驗也今天祐國家請貢稱藩可以息境土之蹂踐可以免生靈之荼毒可以省內帑之供億可以停士馬之調遣乘此閒暇修我邊備若見寧息遂爾偷安則從此邊備寢弛卒然有變將何以應是臣等謀國之忠反成誤國之罪矣請每歲特遣才望大臣四出閱視以今視昔錢穀

贏幾何兵馬增幾何器械整幾何其他屯田鹽法以及諸事拓廣幾何果有成績論武功爵若襲故常罪如失機上嘉納之今三十餘年而疆圍晏如也虜既貪我財物虜中婦女亦貪我繒帛惟恐罷市我得伸縮而制之諸所爲貢市費者卽取諸曩日幕府出征之費不及半也虜得我金錢非盡攜以歸也我之羣商又因而爲利而我數十年所全百萬之命所省百萬之費可按籍而求屈指而論也漢人五餌之策公實用之矣隆慶六年正月下旬上有疾且有腕瘡在理越月稍平以閏二月十二日出視朝既鳴鐘百官入班高拱自閣出比上過會極門望見御路中乘輿在焉疑曰上不御座竟往文華殿耶亟趨赴乃有內使數輩飛馳而來傳呼宣閣下於是拱及張居正疾趨至乘輿所則上已下金臺怒色立欲就乘輿諸內使環跪於側上見拱至色稍平以手執拱袪甚固甚有欲告語意拱卽奏曰皇上何爲發怒今將何往上曰吾不還宮矣拱曰皇上不還宮當何之望皇上還宮爲是上稍沉思曰你送我拱對曰臣送皇上上于是釋衣衽而執拱手露腕以瘡示拱曰看吾瘡

尙未落茹也隨上金臺立上憤恨語拱曰我祖宗二百年天下以至今日國有長君社稷之福爭奈東宮尙小連語數次一語一頓足一握拱手拱對曰皇上萬壽無疆何爲出此言上曰有人欺負我拱對曰是何人無禮祖宗自有重法皇上說與臣當依法處治皇上病新愈何乃發怒恐傷聖懷上不答良久嘆語拱曰甚事不是內官壞了先生你怎知道於是執拱手行入皇極門下丹墀上呼茶于是內侍設椅北向不坐乃移南向始坐而執拱手不釋如故茶至乃以左手飲數口顧拱曰我心稍寧遂起由東角門入至乾清宮門拱不敢入上牽拱手曰送我既得旨拱乃敢入隨至寢殿上升榻坐猶執拱手自御路前至此皆執拱手未釋顏色相顧眷戀藹然時居正及國公朱希忠皆榻前叩頭上猶執拱手拱鞠躬膝側不得下叩頭踟躕不安上見如此乃釋拱手始下叩頭又與居正希忠同叩頭拱辭出乾清宮門外候旨須臾內侍傳宣閣下二臣復入候立寢殿丹墀有旨上來拱遂上殿至榻前上已升座拱居正跪承旨上從容曰朕一時恍惚又曰自古帝王後事卿等詳慮

而行拱等叩頭出仍在乾清宮門外候旨須臾內傳旨着閣老在宮門外莫去拱卽語居正曰我留公出形跡輕重難爲公矣公當同留吾爲奏之拱隨語內侍曰奏皇上二臣都不敢去薄暮內侍傳旨閣下着在乾清宮門外宿拱卽請內侍奏上曰祖宗法度甚嚴乾清宮係大內外臣不得入晝且不可况夜宿乎臣等不敢宿此然不敢去當出端門宿於西闕內臣房有召卽至有傳示卽以上對舉足便到非遠也上允之於是拱居正乃就西闕內朝房宿拱夜不能寐披衣坐候宮門開卽入候起居日數次明日亦如之旣傳聖體稍安拱卽上札子曰臣聞聖體稍安不勝慶幸今府部大臣皆在朝房宿不敢去宜降旨令各回辦事以安人心拱等仍晝夜在內不敢去卽擬旨上以爲然卽時降旨百官皆散人心稍定而拱等日間安如初又四日上覺益平愈拱問安札子有御字心稍安上遣內侍慰勞命拱等還家於是乃還上付托之意乃在執手告語之時此乃願命也受願命時已不能言矣上大漸未申間有命召內臣拱暨居正及閣臣高儀亟趨入乾清宮遂入寢殿東偏室

上已昏沉不省皇后皇貴妃擁于榻皇太子立榻右拱等跪前太監馮保以白紙揭帖授皇太子稱遺詔又以白紙揭帖授拱內曰朕嗣祖宗大統今方六年偶得此病遽不能起有負先皇付託東宮幼小朕今付之卿等三臣同司禮監協心輔佐遵守祖制保固皇圖卿等功在社稷萬世不泯拱讀既慟不能勝即哭奏曰臣受皇上厚恩誓以死報東宮雖幼祖宗法度有在臣務竭盡忠力輔佐東宮如有不得行者臣不敢愛其死望皇上無以後事爲憂且奏且哭已大慟長號不能止兩宮亦皆失聲哭於是二內臣扶拱起遂長號以出拱見居正與保內外盤結事勢必不可爲故有誓死之奏至二十六日卯初刻上崩拱等聞報哭於閣中而居正亦哭乃面有喜色揚揚得意儀私謂拱曰不見張公意態耶是誠何心國家之禍不知所終矣是日已刻傳遺旨着馮保掌司禮監印蓋先帝不省人事已二三日今又於卯時升遐矣而已時傳旨是誰爲之乃保矯詔而居正爲之謀也旨出百官駭愕相顧失色閭巷小民亦皆驚惶奔走不寧獨居正喜動顏色不能自禁閣中宮寮吏卒

無不見之至二十七日馮保打出一報內開遺詔與皇太子朕不豫皇帝你做一應禮儀自有該部題請而行你要依三閣臣并司禮監輔導進學修德用賢使能無事怠荒保守帝業報出人心大駭以爲宦官安得受顧命且此詔今上領受之矣保安得取而打報蓋欲專權亂政故以此示天下以爲吾乃受顧命之人先帝有託乃可以任其所爲而莫敢誰何也然不知二遺詔皆居正所爲前三月十六日忽報上疾重閣下宜赴宮門候宣拱與居正卽趨入至恭默室遙北有居正心腹吏姚曠手持紅紙套內有揭帖半寸許厚封緘完固自後飛走而過拱問送與何人曠答云與馮公公卽疾趨而入蓋不知其主人瞞拱而遂直言之也拱卽問居正是何所言居正面赤惶怖遽答云乃遺詔事宜耳拱默然以爲我當事凡事皆自我同衆而處獨奈何于斯際而有私言於保乎此中必有播弄之事故瞞我而私言之也待看待看至是拱奉遺詔又得皇太子遺詔皆有同司禮監之說乃知居正蓋爲馮保謀也自古有國以來曾未有宦官受顧命之事居正欲憑藉馮保內外盤據窺

伺朝廷盜竊國柄故以願命與司禮監而次日卽傳馮保掌司禮監印
大權悉以歸之而託其爲主于內以蔽主上威百僚使人莫敢我何其
欺先皇之旣崩欺今上之在幼亂祖宗二百年之法度爲國家自古以
來未有之大事嘻亦忍心哉先是某丁故以危機中公會大計給事中
某戊被黜某丁上疏論救諸公以某丁亂政黜爲民公以嫌故不敢出
一言而外廷爭謂公去某丁矣於是某戊輩論劾公不少休嘉靖末年
故相甲與故相某乙厚善踰三年適太宰缺乃起某乙以原官掌部事
明年首相乞致仕而某乙爲首輔入典機務出領銓衡權勢赫奕趣炎
附羶者日益衆一時言官多某乙主會試所舉士頤指色授橫行長安
中舉朝爲之反目乃修故相某丙舊隙摘遺詔中語謂暴揚先帝之失
德以次開釋諸方士之在繫者而專考察科道往日左袒華亭者皆斥
罷尋嗾鄉人告訐者奏發華亭家占奪田土逋負官錢諸不法事下所
司驗問問官希指深入三子皆坐遣戍應沒入田數千頃獄上而公得
罪去事乃寢始公再起與江陵比事無鉅細必相與商榷江陵有所薦

引無不如志而公之門生幕客殷勣杯酒間以私干請者皆不得入則思所以間之一日公問諸門生外間云何皆對曰師雖秉銓部實江陵爲政江陵所薦拔皆引爲己功外人知江陵不知師也公乃漸疎江陵事皆專決不復有所諮問而江陵亦自疑諸爲間者益復以蜚語相煽兩家遂如水火辛未今上在東宮議以明春出閣講學時申文定公王文肅公爲左右中允公皆題陞諭德以文定公爲穆宗日講官而文肅公掌南院去東宮講讀校書悉以門生充補江陵數舉以告諸人曰兩中允見爲宮僚不用而用其私人者何也公爲愧悔而恨江陵益深然公方操權據位所爲耳目爪牙用者率非端人故時望咸屬江陵兩家客百方居間終莫能解也上初即位其大璫馮保嘗許故司禮洪遂孟冲而奪其處方用事居中公首上疏欲上御文華講讀畢卽與閣臣面決政事具儀式以請保全以爲審爾則事權悉歸內閣而司禮益輕欲格其奏乃請上批云照舊制行使文書內臣持到閣公言此疏不發閣議擬而旨從中出者何也內臣以御批對公曰安有十歲天子而能裁

決政事者乎內臣還報保失色故謬其詞以激上曰高閣老云十歲孩
子安能決事上怒入奏兩聖母皆相持而哭是日給事御史論劾保恣
橫不法疏凡七上保益惶急而故善江陵則使所親問計江陵方惡公
欲乘機逐之則以計授保明日召有闕文

陳文端公以勤隆慶元年入內閣今上五齡正位東宮出遇輔臣于馳
道勞苦之公仰見睿姿退而額手曰宗社萬年慶也時華亭徐公當國
而新鄭高公用事兩家門客乘其隙交章相攻朝士或左右袒公獨中
立無所附竟二公去私議不及公公嘗自言朝廷置輔設參本爲協心
體國安事羯羠乃或專懷不受言或引嫌不盡言皆非也故公在政府
若金石相宣壘篋共和及當大事決大疑正色昌言不爲首鼠兩端又
言執事者第虛心潔己奉一人威福聽百司公議挈綱維錫煩苛進忠
賢抑躁競慎守祖宗憲令罷一切紛更恬然而天下理矣自古賢豪功
名蓋天下而無功名之心心喜功名天下始多事蓋公相業未竟乃其
梗概在數語間其學以倫紀爲大宗操修爲實地謂古人盛德大業自

勤小物慎一介始故居恆不輕取予卽燕褻衣冠危坐見世儒聚談性
名掩耳不願聽曰儒者于學譬飲食裘葛耳獨行不愧影獨寢不愧衾
獨居不愧屋漏安事多言人有迂公日笑之者公曰作法于迂其弊猶
通作法于通流污何極或又謂公此不近名乎公曰夫無實而外自標
幟者電光虹采耳若實也日月星辰麗天自古所爲垂簡編勒鼎彝皆
是物也奈何弗好隆慶五年以少傅武英殿大學士致仕卒年七十五
隆慶初法令盡一海宇敕寧公所匡維調劑之力多焉公又以時政尙
恭默希所裁決而近倖多緣內降得橫思于是疏言勵精修政四事甚
切至上心悟已有詔令司禮監設文書案視先朝如公指竟罷之疏亦
留中論者惜焉時某丙旣相銳意有爲與某乙相引重然趣舍異意內
實相矛盾而或陰構其間樞機之地齟齬如也公燭見其微遂有歸志
猶以荷上恩厚義不忍秦越時政賦默以行乃疏陳六事曰慎擢用酌
久任處臧吏廣用人練民兵重五穀上以其深切治理下所司行之其
秋遂乞骸骨有詣公留行者公謝曰若知夫燕客乎主人意怠而尙留

連或罵坐去執與夫威儀秩秩一辭而退之爲有禮也疏四上上察公誠懇乃許之仍賜璽書給驛遣行人護行有司致月廩歲役無何某丙以事去明年某丁以過去又明年某乙得罪乘牛車出國門彷徨自失乃歎曰南充公眞聖人也

張文忠公居正隆慶元年入內閣時天子頗好游而重武公上疏言六事其一曰簡議論謂朝廷之間議論太多或一事而甲可乙否或一人而朝惠暮詖或前後背馳或毀譽矛盾是非淆乎唇吻用舍決於愛憎政多紛更事鮮統紀大抵事無全利亦無全害有所長亦有所短要在權利害之多寡酌長短之輕重斷而行之信而任之二曰振紀綱謂近年以來紀綱不肅法度不行上下務爲姑息百事悉從委徇以模稜兩可爲調停以委曲遷就爲善處刑法之加惟在微賤庶人之議反重朝廷賈誼所謂改轍者欲上攬朝綱張紀法所當加雖貴近不宥事有所枉雖疎賤必伸三曰重詔令謂天子之號令譬之風霆若風不能動而霆不能擊則乾坤之用息造化之機滯欲部院覆奏數日卽報不得

談之樞按行樞按議處者嚴立期限不得延緩停閣四曰覈名實謂今用人者稱人之才不必試以事任之以事不必考其成至於僨事之時又未必明正其罪惟魯少文者無用而見譏大言無當者虛聲而竊譽偶儻抗直者忤時而難合脂韋逢迎者巧宦而易容或以卑微見忽或以名高見崇或用一善而借資終身或因一疵而取病衆口官不久任事不貴成更調太繁遷轉太驟資格太拘毀譽太易欲以嚴考課審名實責之吏部官各久任毋遽遷轉五日固邦本謂近以蠲賦至半國用不足邊費重大內帑空乏分道檢括庫藏盡掃以致水旱災傷坐視而不能賑用兵供餉百費而不能支欲上停免一切不急工程無益徵辦精擇守令講求出納其分道之使一切取回六曰飭武備欲上修祖宗大閱故事張皇六師躬賜校肄旌別技勇汰易老弱疏上褒諭下部院議行於是各推演疏指事別爲演多至十餘條以難公而所謂大閱者上意果爲勳令所司擇日行矣大閱費不訾時方詘而給事中路問禮頗言其非急公亦覺之乃復上疏請停止上不允公之爲政大約以尊

主權課吏責信賞罰一號令寓內外朝下而夕奉行如疾雷迅風無所
不披靡乃煇快於志居恆謂高皇帝眞得聖之威者也世宗能識其意
是以高臥法宮之中朝委裘而天下不亂以太阿不下授也今上世宗
孫也奈何不使之法祖時黔國公朝弼數犯法當逮而朝議皆難之以
爲朝弼綱紀之卒且萬人不易逮逮恐失諸夷心公卽擢用其子而馳
單使縛之卒不敢動旣至請于上貸其死而錮之南京人以爲快漕河
通公以歲賦往往延緩逾春而後發卽水橫溢非決則涸乃采漕臣議
督艘卒以孟冬月兌運及歲初而畢發少罹水患其始司農頗不便之
久而習以爲常太倉粟至支十年歲與虜互市饒馬則減太僕種馬而
多令民以其價納民旣樂于不擾價以時上太僕金亦積至四百餘萬
又爲考成法以責吏治前是六部都察院有覆奏而行檄按勘者度事
之不易行或有所按覈或兩許當質成者其人各以私軋則稽緩之至
數十年而不決遂廢寢公下所司以大小緩急爲期限行之悞者抵罪
自是一切不敢飾非政體稍肅而漸有不便於公者矣御史劉臺公所

取士也由刑部郎改公擬以爲德而臺居頗近數刺得其陰事而惡之俄出按遼東遼東掾御史不當報而臺誤報公以故事裁斥臺臺益惡公自分不得免遂抗章極論公蹟橫十餘事公怒甚見上俯伏而泣不肯起上爲下御坐以手掖之而曰先生起吾爲速臺竟其獄以慰先生臺至下詔獄上命內閣杖之百而遠戍之時物議頗鬻剝公不自安乃具疏爲解得不杖而奪臺職還里上且舉大婚禮故事諸受冊遣聘皆勳臣主之而首輔爲副使公以有服不當與慈聖亦疑之而使中貴人問公恐難於易吉公豔其事乃曰后爲天下母國之大事孰有重者且居正受上恩厚卽令之赴湯火不辭而僅卽暫時吉乎於是公遂披紫橫玉以從事凡十餘日初給事李冰疏謂使居正不服吉不可以將禮而服吉恐非上所以處居正與居正所以自處吉禮非金革比也閣部大臣皆可使不止一居正也上苟惜居正幸更之公雖甚惡冰以其辭直姑切責而付吏部處冰尋補按察僉事王公錫爵意憤憤請以省親告人謂相君不有父而君故省父以形若短且君何以責相君深乎錫

爵曰吾自有父不知有相君且相君之自爲情而自奪之夫上奪之可也今乃徵太后中貴人以要上卽如所請不入朝不衣錦可也而今且衣錦而從吉卽從吉吾意其願之有泚而顧揚揚自誇詔謂人何幸躬逢其盛于是竟請告以歸公之葬太封君也巡按御史趙應元以候代襄陽不及會葬旣得代而中悔恐獲罪于公上書移病歸前是有旨御史在外不得輕移病非撫臣爲代請而移病者都察院糾察以聞然亦視爲故常莫有舉行者而公之門客僉都御史王篆時佐院要脅其長陳玠使論應元時呂公調陽以疾在告不出而張公四維等擬旨特斥應元爲民中外知其所自咸懋懋而戶部員外郎王用汲遂劾玠以非法陷應元阿附權臣應元不當罷且謂星變而考察所懲抑者皆居正所不喜宜斥玠而留應元其辭峻詔奪用汲官亦爲民公見用汲疏怒甚力辨其事謂臣賦性愚戇不能委曲徇人凡所指畫措施一概之法所當加親故不宥才有可用疎遠不遺又務綜覈名實搜剔隱奸權抑浮競以是大不便於小人而傾危躁進之輩游談失志之徒又從而

鼓煽其間相與慙慙嗾獵冒險鉤奇以覬幸于後日爲攫取富貴之計蓄意積慮有間輒發故向者劉臺爲嵩權之論今日用汲造阿附之言夫嵩權阿附者人主之所深忌也日浸月潤鑽金銷骨小則使臣負大嫌而不自安大則使臣中奇禍而不自保明主左右旣無親信重臣孤立上上然後呼朋引類藉勢秉權恣其所欲爲分更變亂不至于傾覆國家不已此孔子所以惡利口大舜所以疾讒說也臣日夜念之憂心悄悄故敢不避煩瀆一控之聖明之前遂以明告天下之人臣是願命大臣義當以死報國雖赴湯火皆所不避况于毀譽得喪之間皇上不用臣則已必欲用臣臣必不能枉己以徇人必不能違道以干譽臺省紀綱必欲振肅朝廷法令必欲奉行奸宄之人必不敢姑息以撓三尺之公險躁之士必不敢引進以壞國家之事如有捏造浮言欲以焚惑上聽紊亂朝政者必舉祖宗之法請於皇上而明正其罪此臣之所以報先帝而忠于皇上之職分也嘉靖末徐公階執政而李公春芳在禮部患宗室日蕃衍中外數萬人皆仰給縣官國土之入不足以供歲額

相計議爲宗藩條例于封襲婚娶子女名數祿賜之屬苛爲之限至是公條摘其間彼此矛盾前後牴牾或減削太苛或議擬不定或一事而或予或奪或一令而旋行旋止或事與理外空礙難行或法與情乖輕重失當者皆指實言之請下禮部會議編入會典遵守報可公于諸藩王賂卻不受亦無敢以私干者時上漸備六宮太倉所儲金錢多所宣進公乃因戶部進御覽數目而陳之謂每歲入額皆在其內錙銖畢盡今萬曆五年歲入四百三十五萬九千四百金而六年所入僅三百五十五萬九千八百餘金則已少八十餘萬金矣五年歲出三百四十九萬四千二百餘金而六年所出乃至三百八十八萬八千四百餘金則已多四十餘萬金質之院部云因諸省請留蠲免之不時追贖人犯財產之已盡奉旨取用之屢下是以入數減而出數溢也因甚憂其不可繼而請上置之坐隅時賜省覽量入爲出罷節浮費疏上留中上復傳旨工部置錢應用公亦以利不勝費止之時言官請停蘇松織造公面爲委曲以請得損數之大半復請停修武英殿工及裁省外戚遷官恩

數上多曲從之一日上御文華殿公侍講讀畢而以給事中所上災傷疏聞之因謂鳳陽及江南諸郡屢無歲而徐宿之民間至削榆皮爲粥不早賑之則相聚爲盜賑之不可緩上曰惟先生所處公復奏上至仁愛民如子凡請蠲請賑無不賜允而在外諸司往往營私背公剝民間上非惟不體皇上子惠困窮之德意且不知臣等所以替皇上之愚忠殊可恨也今給事疏云報災則曰不敢報云請蠲則曰不敢請有何不敢報與請而推調支吾歸怨君上卽積穀一事屢奉旨申飭竟成虛文彼皆有自理贖贖未嘗佐公家之急將焉往臣等不勝憤懣竊以爲此輩若遇聖祖不知當處以何法上怒曰審爾何不重處之公拜領命乃又曰邇年正賦不虧府庫充實皆以考成法行徵解不爽今江南北窮甚矣河南風災輔畿亢旱將來蠲賑恐不能已惟皇上加意節于宮中一切用度及服御可省者省之賞賚可裁者裁之至于布施一事尤當禁止與其惠緇黃之流以求福孰若寬恤百姓全活億兆之命其功德猶大上曰然用度當從省卽賞賚亦故事耳無所增加公又曰夫故事

者邇年之所偶行遂據以爲口實非祖宗故事也世宗朝用最爲不節而晏駕之後尙餘百餘萬金今歲之所進內帑者二十萬而隨取隨用常告乏者故事必不爾也願皇上留神上首肯之于是有錫貨而督責奉行者之旨肅如矣當時大察吏部尙書何寬與郎中李已惟公命是聽抗公者惟艾穆沈茂學鄒元標皆已遠戍督撫大臣故折挫之使不堪冀以聞于公取一快而王篆旦夕待公知公不釋意于劉臺以是乘間使其鄉御史賀一桂嗾怨家疏其盜邊銀數事于是江西之巡撫王宗載巡按陳烱下有司悉爲之證實而遼東巡按于景昌傳會之坐遠戍而繫追其贓金又繫其父子竭產以償不得則別以富人犯者寬其罪而爲之償而後遣戍至嶺外無何飲于其王至所歸而暴得疾以死或曰戍主有所受毒之也而是時王公錫爵歸省久之不出其女得道仙去有所奉大士上眞俾錫爵與其友大理卿王世貞築室于城居之而女仙之蛻附焉錫爵爲屬世貞爲之傳語播傳京師給事中牛維垣御史孫承南故嘗客曾省吾謂此奇貨可以贖公也省吾遂爲維垣具

草與承南先後論劾錫爵等語危冀以動搖上意事下禮部而尙書徐學謨方思所以報公攘臂謂此妖孽不可長也具稿欲大有處而慈聖在西宮聞之不懌使張貴人宏語公神仙者何預人事而言路批劾之公意縮而學謨方盛氣以見公公笑謂此二人者皆君鄉人也事甚小但已往不足道學謨蹶然而退遂停寢而南中給事吳之美輩復吠聲有言報聞而趙用賢吳中行亦與王公錫爵家近王篆與曾省吾意未慊則風陳舛使用故嘗請奪情御史曾士楚按吳使伺用賢中行短而甘心焉且因以孽錫爵士楚之吳初爲御史新脅于長不得已具疏而中悔之既至嘆曰吾嚮者猶秦虺也而今乃使我鷹犬耶且吾已愧人復安敢愧天因絕不復問移疾歸而公竟亦無他有狂生吳仕期者寧國人也與沈懋學善時茂學亦移疾里居而仕期嘗欲走京上書有所規于公茂學止之其語頗流聞而吳中輕薄子僞爲故都御史海瑞論劾公罪惡亦傳至寧國而有梓之者操江都御史胡慎燭同知龍宗武使究其人不得則執仕期以塞而慎伺知其爲茂學友也使宗武捕而

引懋學且報公欲自以爲功而公意不欲彰聞曰小豎子耳何足煩白簡王篆則貽書宗武必令引懋學而宗武不可且餓死仕期于獄而寢其事公嘗纂古君人治亂之事而條治者八十一亂者三十六以應陰陽之數繪而爲圖以俗語解之使易曉至是復囑儒臣紀高皇帝及列聖寶訓實錄分類而成書凡四十日創業艱難曰勵精圖治曰勤學曰敬天曰法祖曰保民曰謹祭祀曰崇孝敬曰端好尚曰慎起居曰戒游佚曰正宮闈曰教儲貳曰睦宗藩曰親賢臣曰去姦邪曰納諫曰理財曰守法曰儆戒曰務實曰正紀綱曰審官曰久任曰重守令曰馭近習曰待外戚曰重農桑曰興教化曰明償罰曰信詔令曰謹名分曰裁貢獻曰慎賞賚曰敦節儉曰慎刑獄曰褒功德曰屏異端曰飭武備曰禦夷狄其辭多檢切請以經筵之暇進講又請立起居註紀上言動與朝內外事爲修史張本日用翰林臣四員入直應制詩文及備顧問上皆優詔報許萬曆十年以太保卒年五十八

趙文肅公貞吉隆慶三年戊辰入內閣時文武邊臣建議欲招揀南兵

十萬于張家灣公執不可曰往年南京建振武營致大變今乃欲建振武營於都城之側哉况燕薊乃戎馬場豈藉南兵當事者悟遂移練兵于薊鎮惟棟南兵三千教烏銃識者謂爲得算頌之奉命充講官爲皇太子千秋講唐太宗喻太子章薊鎮奏修敵臺幾千座公以爲徒費無裨戰守欲因講語中力言之爲執政格不得上公遂悒悒懷去志而上之眷用意益篤庚午上書遵祖制收兵權以飭戎務其略云我朝內外御兵分隸五府乃高皇帝定萬世太平計以免前代權臣握兵之害永樂元年因聚府兵北伐旋旋師後遂結營團操乃以三千神機二營附之因號三大營其實皆五府兵也正統末年嘗變爲十團營弘治間又加爲十二團營正德間又添置東西官廳然五營之號未泯而五府之意猶存也至嘉靖庚戌嚴嵩欲爲賊仇鸞地遂請將設戎政所括內外兵鑄總督戎政印以授鸞夫以五府外而別立一所則盡變太祖分府之意以十餘萬衆而統于一人則盡變成祖分營之意向使鸞遲于伏誅則時事之危未可測也合無將見操官軍九萬人分爲左右中前後五

營各擇一將以分統之責令開營教習仍以文臣巡覈之每歲春秋校閱凡將官之能否軍士之勇怯技藝之生熟紀律之嚴緩皆得奏聞而賞罰行焉要令五營齊成精銳有事則令勅掛印命將于闐外事畢則繳勅納印歸將于營中如是則太阿之柄獨持于上而輦轂之下有數萬精兵隨所用而宜矣奏上上稱公忠謀且曰分營兵乃祖宗舊制遂下廷臣議行時本兵科挾前議大同功罪事遂蜂起異同乃至朝更夕改反失公建白本意高公拱尤銜故相徐階欲中以重法疏言當時議事臣假托遺詔凡先帝所去如大獄及建言得罪諸臣悉用超擢死者贈官廕子無乃仇視先帝爲無君之事又引弘治間彭程事欲有以治之閣中擬票將如請公拂衣起曰若是將如宋時奸黨碑矣拱色變強留公乃共改票止于吏部通行曉諭而已又因公言去大獄字拱以是迄不得逞於徐公隆慶四年以太子太保兼都察院致仕卒年六十八公在政府日給事中某甲者爲同官某乙嗾劾同官某丙而都御史某丁因訐某甲贓事抵戍後某甲倚某乙辨復力擊某丁與司寇某戊

欲因以傾某丙乃奏行法司而刑科給事中某己參之寢不得行某乙懷怒思欲一逞于是考察科道旨從內降出公曰是將倚法爲報復計非所以惜人才成聖治也上疏請止之某乙聞卽上揭謂有成命竟不可止公曰此旣出朝命吾不可不與共事遂赴吏部偕行考公執筆有給事中某庚者故嘗劾嵩父子譴戍起用自守抗直不附乙者也乙銳欲去之公獨不可爭至日中乙知公不可奪竟從公故臺省名士得全者衆然乙益恨公刺骨業已嫉心腹給事某甲者枉劾公公疏懇乞歸休且曰願上准臣放歸田里令乙復還內閣毋久專大權樹衆黨別選老成掌部院事庶上不悖祖訓下不失諸臣之職掌命下以公屢辭遂允暫馳驛去

張文毅公四維以萬曆三年入閣時某甲柄國以刑名一切痛繩海內其治若束溼人心囂然公燕居深念間爲諸臣言此難以顯爭而可默奪今海內厭苦操切久矣若以意示四方中丞直指令稍以寬大從事而吾輩無深求刻責宜可以少安人心及皇嗣誕生公喜曰時不可失

乃手疏勸上宜以大慶施惠天下省督責緩征徭舉遺逸恤災眚以養國家元氣而出諸司所擬寬條凡數十事以進上欣然命行之先是席某甲竊者憚公而易諸閣臣疏上以暹公及某乙以論罷計阻則設事構隙因太宰某丙被劾罷嗾御史并劾公御史楚人也上曰元輔忠臣御史何得妄言持其章不下手詔趣公出憚公者愈不自安則夤緣罪人某關說權璫某將爲公難御史疏再入上怒鑄御史三級出之外公上疏引咎乞宥言者上褒答不許是時權璫驕恣甚上積不能平語浸淫聞外言官亦微知上指乃共爲疏論某及某不法狀上震怒立諭公擬旨曰奴輩盜我威福久其亟誅之乃下某詔獄論死安置某于南京籍其家言者因追論某甲事上欲窮竟獄公從中救解事得暫已然一時某甲私人遣斥殆盡公請詔臺省舉骨鯁端亮之臣或超巖穴或拔自久淹期月間耆賢在列朝寧改觀焉公一秉政而滌煩苛鋤荒穢拔根株窟穴之奸于主上之側而其沉謀秘畫有人所不及知者然公口不言功而言者或攘以爲功公亦不自明也

馬文莊公自強以萬曆六年戊寅入內閣爲禮部日曹郎以故事請曰
某事當白政府乃行公曰尙書國之大臣而輕爲輔臣屈體至仰承其
風旨吾義弗爲也益任法行一意自如以是不能無與柄臣左而公素
行高所持義又正卽欲中之以事未得間及入閣而閣務皆首臣專之
其次率拱手受成以爲常公獨時時從中有所匡正曰吾不能令千秋
後居伴食之名然意所齟齬十恆不能得一二而又念上恩厚欲決去
者不可以鬱鬱感疾竟不起當公未相時或以媚竈諷公者引蕭曹房
杜相結納爲言公報曰蕭薦曹房薦杜可耳必曹杜干之吾甚愧焉

申文定公時行萬曆十年以禮書入內閣時宗室宸涼等六百餘人公
面奏舊制宗室年十五請封請婚按臣覈以聞禮部題給封號許成婚
好未覆請而婚者所生子女不得封定例也此六百餘人皆應奪但封
于嘉靖二十八年事在例前念其年遠人衆惟上恩之俾及於寬政幸
甚上深然之庚辰淮揚災時撫至有議開墾者公曰流移多則服田者
少而欲舍已成之田墾積荒之地必至驅現在之人而流移矣且彼最

苦者班軍班軍一歲番上而耗伍二三班價一歲併征而扣糧八九衛所無羨丁而多重役月糧無見支而有出辦不處此二者而欲民無流亡不得也漕撫乃具疏以請得各免四分之一壬午江陵病卒蒲州代之語公曰良莠之餘要在芟刈公應曰肅殺之後必有陽春蓋一言而公之相業定矣會皇長子生乃與蒲州張公盡取諸司所擬寬條損益之如省煩苛緩征徭恤災荒酌郵傳平刑獄罷工作一切以寬大行之而蠲新稅不蠲舊逋俾人活實惠而奸民不得濫免公慮遠矣江陵雖逝其黨伺隙思騁相與構釁劾罷陽城宰并及蒲州公慨然曰吾尙可以默乎乃盡發馮保徐爵諸人與外廷表裏爲奸狀諸言者繼之上命公擬旨下爵詔獄論死安置馮保南京籍其家而趣蒲州出視事公乃佐蒲州因人情而順流與之更始已代蒲州爲政首以疏請于是吳中行趙用賢鄒元標諸人皆起謫籍爲中朝顯官而言者氣益張或說公曰人以言舉擢塗也審爾孰不以政府爲射的耶公謝曰吾知崇獎言路爲盛世事違卹其它未幾有魏凡貞者以公子登第爲言公第請覆

試而已不以一語侵之頃之且寘之要職朝士無不嘖嘖歸公之量矣
江陵奉旨籍沒求多者日衆公言居正自干憲典素無可言若老母之
衣食不時子孫之死亡相繼於罪人不孥之意不無過當力請上寬之
而復有因罪江陵議復遼府者公不可謂江陵之破家遼庶之亡國皆
其自取原不相蒙且皇考懲惡之大典不可變親藩覬覦之大釁不可
開已毀之府第營繕不費旣廢之親王本支彝禮竟擬旨罷之有內臣
張維者好文雅能詩上呼爲秀才掌兵杖局駕常幸局觀所造器械因
令內豎勝兵者肄習之或言先朝有內教場演武者武宗時事也于是
選內豎二千餘人分操練每以五鼓從東安門入及晨而散砲聲相聞
略如三營法練之公上疏切諫會部臣董基以諫言極對切上怒請外
任廷議洵洵閣臣深以爲虞公乃傳語大璫云此事屬在內廷諸人環
甲荷戈未明而進設有奸宄乘間闖入外廷不及開宿衛不得入公等
何以待之此莫大之憂也諸大璫聞之色變以閣臣言力奏上遂止罷
皇長子五齡而儲臣未建公約同官于歲首合疏以請上以元子孱弱

爲解公復力言元子五齡卽未甚壯方之宣孝兩廟實已過期夫修講讀之故事備朝賀之禮儀或不任勞苦在宮中一受冊在文華一受朝何勞之有上報語意溫然絕無他意而廷臣不勝過計迫得之給事中姜應麟銓卽沈璟相繼有疏上欲重違公與同官再三教解上曰此輩疑朕立幼廢長欲置不善之地故以此處之中人傳示再三不得已稍擬薄罰由此衆議紛起上寔不能堪而意亦遂逡矣宗室越訴者踵至公疏宗人許奏魯王奉旨令撫按啓王審勘虛實若不信親王而信一宗人其害甚大蓋國之紀綱有四親王轄宗儀將帥轄士卒有司轄百姓提學轄生員大小相維而天下治若不能鈴束而人人競起亂之道也上深然之一日公謂同事曰冊立久稽異說遊起奈何乃疏言高皇帝有曰朕聞皇帝之子居嫡長者必正儲位諸子分茅胙土封以王爵此萬世所當遵守者成祖以永樂二年立仁宗爲皇太子卽封趙王英宗以天順元年立憲宗爲皇太子卽封德王崇王臣思列聖傳家世守之法體皇上愛子均一之心竊謂皇長子正位東宮皇三子分封大國

一時並舉尤爲盛事疏入不報公又念上輟講日久上言高皇帝經營草昧備極勤勞而猶日與儒臣講易書大學論語至洪武二十九年春秋七十矣猶命博士許存仁進講經史世宗經筵日講外復講大學衍義蓋臨御四十年如一日也願上以二祖爲法隨檢閣中故牘得高皇帝御筆勅諭詩文共七十六道裝潢呈覽因言望上於語言文字之中求聖祖之情蘊于陟降著存之頌法聖祖之憂勤上忻然納之上御毓德宮召四輔入上手示評事雜于仁疏怒其語懇欲重有所行遣公力爲解釋天顏頓和卽以册立豫教請上曰皇長子倫序自定須其稍壯行之因命皇長子出見公賀曰皇長子龍姿鳳目岐嶷不凡此國家無疆之福也時以劾瑞鯨者衆命公戒諭之公跽鯨于前一責數詞嚴意正聞者竦服明日公遂上疏曰皇長子倫序已定今皇上內斷于心外廷未知也臣等雖承面命海內未知也惟亟下明詔使天下知皇上于愛子不出臣下之仰贊而出于淵衷皇上重子升儲不由外廷之陳請而由于特詔何盛知之上未卽允嗣後公或合疏或特揭皆未報公

又特疏曰當今國家第一大事無如冊立元子而臣等第一職業無如建儲一事祖宗家法儲位未有不歸元子者祖宗不可違悖冊立不可遲疑一也臣等先年奉旨云立儲以長幼爲序上復屢屢言之今年元旦上手挈元子令臣等諦視親諭臣等長幼之序言猶在耳皇貴妃獨蒙眷注屬意所生中外臣民頗多後議獨臣等不信以爲元日親奉玉音謂皇貴妃每勸冊立安得此不根之言乃今鄭國泰之疏既上而不報已票而不行外間疑議以爲皇貴妃姑令國泰塞責皇上姑爲皇貴妃解紛使疑在宮闈憂在社稷何以杜百萬軍民之口副四海九州之心二也臣等謂祖宗一定之家法決不可不遵皇上已出之諭音決不可不信皇貴妃未白之心事決不可不明惟立決大計早釋羣疑幸甚上覽奏報可仍令內侍傳示閣臣候旨行是秋套虜火落赤鈔掠洮河熱番入據莽刺川數出鹵掠邊將有戰死者廷議焚焚有罷款決戰之議公謂禦戎如用藥隨病製方不能執一今一二小酋間有猖獗而大酋全部尚在羈縻勢不得不撫其或陽順而陰逆暫去而復來或縛獻

罪酋或送還人畜又不得不酌于戰與撫之間今不問是何部落有無
順逆輒欲驅久不習戰之兵禦方張致死之虜非完計也立請廷推鄭
尙書洛暨深雲龍萬世德經略之移檄切責順義趣其東歸聲大酋之
罪勦兵出勦自是莽刺川絕無虜跡而它酋與火落赤相表裏者亦烏
獸散是時言邊事者率未中竅公極口辯駁不無相抵牾遂交章攻公
公疏辯者六辭職者五且請盡下諸彈章以憑覆按忌者意必趣公以
去公具疏申明邊計絡繹餘萬言且請九卿會議陸公光祖等復奏俱
如公指衆譁乃稍定卒年八十自古建立儲貳皆人主獨斷而宰臣從
中調劑委曲贊成未聞小臣能以口舌得之者今上聰明英毅宮闈肅
如皇長子天序默成宸情獨注諸閣臣嘗見于毓德宮上手攜皇長子
擁樹膝前眷愛特至無纖芥可疑而道路訛言鄭貴妃方見寵幸母愛
子抱事未可知外廷章疏媚毛而起上怒遂加譴斥而言者猶未已歲
庚寅冬忽遣文書內臣語閣中若諸司不來激聒明冬傳後年冊立如
不遵者待十五歲舉行閣臣謂上已有明諭臣下自當遵奉稍需一歲

大事定矣每諸司接見皆以此言告之故辛卯之歲自春及秋未有言
建諸事者而工部主事張府德忽復言之時公方在告不勝驚愕方欲
與同官兩公商榷而新安相公故健忘若不知有前論者乃曰小臣以
建諸請而吾輩大臣業無一言可乎倉卒具一疏首列公名以進公聞
之歎曰大事去矣小臣雖犯激聒之戒而吾輩大臣恪守明諭不失信
于上乃可以要上之全信今吾輩與小臣接踵上疏上必訶責小臣故
犯從中處分冊立事必再改期吾輩疏特報聞耳奈之何哉公乃別具
一揭云臣已在告不預閣中事同官疏猶列臣名臣不知也臣謂冊立
之事聖意已定諭旨已明向來兢兢恪守不敢違越以俟來春舉行小
臣愚妄不諳大計不足責也惟上宸斷親裁勿因小臣妨誤大典上手
賜批答趣公亟出而不及建儲事故事閣臣密揭皆留貯閣中不發科
而新安疏亦與諸疏同發時羅給事大紘新任公令典籍從科中取回
送閣次日科臣來索閣中以故事卻之大紘乃疏給公迎合上意以固
位而武英黃中書正賓繼之公有疏辨上復優答然人情世局如狂瀾

沸鼎閣臣何以自安後十餘年而儲位定矣向之紛紛竟何爲哉

余文敏公有丁萬曆十年以禮書入閣辦事會浙兵大譟凌紀制府度不可解則烽屯而櫻於市朝遣左司馬張公佳胤以節鉞往過公問計公曰是窮獸也且致死爭旦夕之命奈何以徒手搏之張公遽問計將安出公曰聞河南人徐景星者有機略舊領此軍今失職待專劄門張公呼至挾而南景星身居其間亟論以禍福諸軍故信景星爲縛首事者詣軍門謝梟九人於市浙兵乃安申公時行當國許公國與公皆同在政府鑒於前之務相矯者而江陵旣敗言者尙齟齬不已乃引科場命題以搖上心太宰楊公曰不可是欲於口語文字間起大獄邪因覆奏語侵言者言者譁然詆楊公爲阿吳門競請斥罷二三大臣亦多抗疏引去明言非是獨公內直爲上調劑之奏牘滿几日應接不暇居數日乃密疏言言官可任孰與諸大臣今以一言官故而使諸大臣側足求去非盛世事如聽其去則臣愚亦有去耳上意動于是遣二中使齎手札詣申公及許公邸諭意而太宰亦復位諸大臣始安公有力焉卒

年五十八

王文肅公錫爵萬曆十年壬午入內閣辦事先是公以江陵相父喪奪情疏請省父得請還里再起入閣首以朝廷裁恩澤士大夫重廉耻爲第一義故凡陵工河工邊工及玉牒加恩屢懇賜免庚寅元日召四輔臣入上手擁皇長子令就視輔臣趨拜已命皇三子繼出輔臣擬拜如前上力止之曰不可旋出雜給事于仁疏欲寘之法而獨寓目公曰卿意云何公曰于仁誠有罪第當以重法則于仁之罪人不知以爲訕上而以爲納忠皇上下之法人不知爲治狂而以爲拒諫上意頓釋因以升儲視朝請上首肯之明日忽奉御札以冊立豫教分爲二事一可一否甚而疑羣臣之請爲離間公疏云凡稱離間者本貴而間使賤之本親而間使疏之皇上手擁皇長子明示臣等以長幼之序臣等因而早勸冊立以成皇上之所欲貴又因而進愛勞之方以成皇上之所欲親何名爲間也具言冊立與豫教一無可緩者自後或公疏或獨請後先六上慶慶萬餘言有云建儲一事前有皇長子始生之明詔後有臣等節

年所奉之屢旨公有兩京各衙門之合奏私有皇親鄭國泰之專請近有都城里巷之流言遠有四方萬姓之屬望而上則臨之以九廟之神靈兩宮之慈訓皇上豈可差舉一念而臣等亦豈可苟順一言者既而連接御札冊立元子倫序已定朕豈有溺愛偏執之意待過十歲大典一併舉行公因謂同官曰聖意無他止以冊立大事不宜自臣下發之吾輩但當拱默以俟耳會曠議起上遣問閣臣公力陳其非便一防鑿徒二費多得不得償失三官禁繹駁四示國匱形令四疆窺淺深非算事得中輟辛卯公以母病得請去而柄地有陰導之者開採之役迄不可止矣癸巳公又屢召復起居數日密以建儲請上論援祖訓立嫡不立庶欲暫將三子一併封王且待數年中宮無子乃行冊禮命公作一論旨公隨奏上向未有待嫡意自今始發使臣等何以奉行因歷舉自古中宮養育庶子者欲皇長子卽以中宮爲母早成大典雖依閣中故事並擬傳帖二道而求上俯從其後者尋奉御札聖祖垂訓豈敢背違學他人之假借以倫亂眞哉遂擇公所擬前論批發禮部而外廷紛紛議

起公復具疏請收回並封聖諭早定大典息衆累次日奉諭昨者元輔
反覆勸朕早行冊立此朕去歲之命復何所疑因恐背違祖訓日後事
體難處故暫將三子並封今外臣爭論不知何意已光祿寺丞朱維京
刑科給事中王如堅各以立儲建言謫戍公業爲教解因連進二疏一
請急勅九卿科道衙門會議一請召對面陳上未允不得已以三誤引
咎旋得御札卿若引咎置朕何地既爾俱不必封少俟二三年行之公
復據初詔請定大典未得旨又請先行豫教安人心先後四揭皆不報
時以考察拾遺部科議不合考功郎趙南星被劾禡職禮郎陳泰來等
疑閣臣主之而通政魏允貞少卿曾乾亨相繼論列不知公於察典毫
無干涉且惜趙南星材器當吏部引罪疏未下已先揭救矣陳泰來諸
臣上欲大有處分又疏力解之公見國是人心日就散亂乃疏陳泰交
要務期以定國諭一政體而大旨歸之主與臣交大臣與小臣交當事
者與言事者交反覆數千言悉中窾會而請召對請御門請發章奏請
洒宸翰免口傳及擬定進講經書資啓沃皆忠謨之大者八月彗星入

紫微垣公疏言紫微垣乃王者之宮太子之象惟早行冊立可禳此變
至十一月十九日上獨召公于暖閣公卽申前請上曰稍需之公曰皇
長子年十三歲矣復何需民間子弟無十三歲不讀書者况國之元子
乎上召曰朕子明歲當蓄髮期矣卿奏洞悉苦心公出連上六疏危言
切論有人不能堪者上略不爲迂閤十一月初一日始奉札冊立俟旨
行且於明春行豫教出閣禮朕又思二子年相等今並行出閣禮或先
後行卿可詳酌之公請皇兩子少待次年以示等差上報可因請侍班
講讀選詞林諸臣并擬閣臣侍班期以上悉用東宮儀冢上俞允天下
始曉然知元良之位定矣而中人開買出閣之費至踰三十萬公又具
疏曲請得少減上旣美明獨斷觸迂者不復賜還甚有以後言加罪前
言一事波及一署者外廷不測且以歸咎輔臣而士論愈激愈囂遂成
水火之勢公嘗進泰交用人兩疏雖蒙溫答未實舉行自念國本旣定
可了出山之局而去志自此決矣會有大病卽得請歸因密薦舊輔王
公家屏又兩疏請增閣臣丁未上又遣行人敦趨入朝有虞公出而欲

扼之者與乘而修伎者爭以三王並封及密揭爲詬病不知先朝輔臣里居例得密封言事或賜印章爲識者有之卽王文恪講學勤政之疏桂文襄知人克己之論具載集中未有槩其非者若三王並封上自法肅皇帝爲之非公意衆非不知特欲加之罪借以辭耳歲戊子公子衡發解北畿禮部郎高桂疏中式可疑者八人衡與焉公疏請覆試語稍激刑部郎饒伸併疏攻公上怒置之理公揭請免逮且見喬御史壁星疏以古誼規至不難引咎謝乃己辛卯公已致政歸冊立禮成上聖母徽號推恩舊臣賚勅存問曰冊立朕志已定但因激聒故從延緩知卿忠言至計尙鬱于懷今元子已冊立爲皇太子冠婚並舉念卿家居繫心良切特諭知之聖諭拳拳若以報成事於公而忌者猶謂非其本謀可怪也乙巳聖母壽開六表適皇孫誕生加上徽號推恩再被存問公陳謝附以規諫丁未上思公不置復召輔政加少保遣行人敦趣入朝而公父子交病公辭益堅攻者日益衆而上旨益溫召命終不可挽蓋上雅欲以廉節勵世磨鈍如嚴公清海公瑞業峻擢之而手書公名於

御屏特署曰清正其簡在帝心尚矣上又懲江陵往轍於臣下疑信者半而獨任公如一日噫亦思公有以自結主知必自重而人乃重之也耶故相某甲既沒上始親政采羣望而用公公既立朝持論侃侃常斥阿附抑躁競絕不以某甲時事爲趨舍言官有微知上意擊去權璫而恃功驕恣者以壽宮啓覺傾排大臣公抗疏折其邪妄詔鑄三秩異議爲之少息未一月孫公鑣以事謁政府新建張公位謂鑣曰頌王公司綸綽上有所易也必中使諭意王公堅執論率十從五六卽不從亦必仍至閣道所以乃發今以我輩或不知有徑中發者矣上智出千古必不謂袞衣之有闕進說輒左惟王公能窺上意所向以頌德先之乃後約之繩直故所言皆合彛不圓轉而冰釋我等訥訥拂辭如槌撞鐘水投石矣然則今日之事由公去位故若此使公而在列必能先事以弭隙上亦有所顧慮利孔未開百司奉職猶昔也然則公安可一日不出也張公又云外廷讜議我豈不願左袒第上所托腹心者惟我等二三入若失分謗之意而惟衆是從上必曰汝亦背我獵下譽此一綫絕堂

陞亦睽隔矣夫宰相冒不釋之疑然後天下蒙太平之福蓋昔人屢嘆之矣此爲相所以難者也公初求去甚力疏五六上不已上嘗輟食不樂左右屏息一老內人前問焉上曰汝揣我何念內人曰慮王閣老去耳上曰然爲奈何安得公清不避怨如茲人者蓋都下相傳言如此許文穆公國萬曆十一年癸未入內閣時有摘科場事語侵大臣者公請辯邪正以定國是謂昔之專恣在權貴今乃在下僚昔之淆亂是非在小人今乃在君子又言大臣猶檉棹也宜取其閱歷略其寸朽言官猶江河也宜導之疏通息其風波時以爲名言臨洮之變首輔欲俟虜王回巢專力公言戈矛不在敵國而在穀下安攘不在兵食而在紀綱其持論慷慨引大義類此

王文端公家屏萬曆十二年入內閣丙戌以母喪歸凡五年上遣行人敦趣十六年還朝時上御朝漸稀公入都數月猶未得面乃上揭言邇來朝講久輟章疏頗留典禮並廢綱紀漸弛衆心喁喁請以聖節出御畢發奏章以慰海內不勝大願上覽疏感動遣中官諭旨曰王閣老忠

愛之心朕已悉喻翌日爲出御門延公進見焉會廷臣請建儲久未得
允人情大譁中官李俊諭公冊儲之禮當於明年傳示廷臣毋復奏擾
如有復請直過十五歲方行公見聖示有期大本已定乃擬傳禮以進
請宣示百僚因隱十五歲語又度未可下也以便先錄詔馳報禮臣行
卽具疏以復謂適奉玉音謹以通行南北諸司傳示大禮有期令其靜
俟而亦隱十五歲語上旣不許宣示及見部疏復遣諭公後所傳止令
卿知爾奈何遽爾示禮臣且部覆是何等語會科疏亦上並得譙責然
上雖不懌而建儲之禮亦因以有成言皆公所調護也明年八月工部
郎張有德復請造辦公恐有德言入或致激誤欲因而就之乃亦引諭
旨以請上旣怒有德因責輔臣不當附和又爲更期三年於是許公國
策罷公乃疏言國所具揭臣實與謀乃至稽緩大禮國去臣不得獨留
請並罷臣疏入報聞而其時申公時行亦去柄政且屬之公公乃請趣
太倉王公入侍而與新相趙公志舉同居政本會曾少卿乾亨議汰京
衛官京衛官遮尙書同享於朝公在闕聞狀急遣人出諭天下有叛軍

寧有叛官若曹敢于禁地遮辱大臣罪死不貸衛官聞皆解散有司欲賞毋問公執不可請令五府詰主者名置之法事乃定明年壬辰科臣李獻可等又以豫教儲教請嚴旨誦罰公輒封還御批力請寬宥疏入不報而他申教科臣者得削除甚者子杖公因稱疾求罷言儲宮豫教自宜早圖科臣所言未爲差謬而以臣封還內降致獲譴訶誦創轉相株累道路之猜疑橫生宮闈之讒構交作其于虧損聖德動搖國本非細故也今臣旣無匡救若復漢認依違正漢臣汲黯所謂從諛承意以陷主於不義詒辱朝廷死有餘戮請急罷臣以謝天下疏至三上辭益痛切上終不允而遣中宮臨問論曰卿其洗沐醫藥自輔毋言去也公具疏謝因堅臥不出又再請乃聽而令守臣偵其起居以奏曰將復召云或謂公相臣也卽諫不從宜少濡忍以就大事奈何取一決爲高公謂否否古之人主惟所欲爲皆以大臣持祿小臣畏罪有輕下心爾吾意大臣不愛爵祿小臣不畏誅罰事宜有濟聞者服其言公去三年元子出閣又數年青宮遂建公舉手加額以祝齋沐表賀上亦遣行人齋

羊酒銀幣問公于家方江陵張公病時朝臣相率請禱公謝不住及敗
見籍沒所收交遊問遺書無公姓名蒲坂張公繼秉大政以同里故數
從公受策多所規益其後時政益務恢闢朝士或詭激樹名爭欲有所
措置積爲當事所苦公毅然中立無所依阿獨嘗以大義兩臂解之交
相服也迨升揆席惟公延納侃詞正色百僚傾仰迄無後言

陳文憲公于陞萬曆二十二年甲午入內閣公少從太傅公習國家故
實入詞林後更留意通今之學國史家乘無不折衷而討其至謂實錄
實訓秘在金匱而會典職掌又渙而不屬野史諸家更稅而不典苟不
及此時修正史何以昭一代之盛乃上疏請做宋正史例開局纂修詔
允行乙未冬言官同時被旨落籍者二十餘南北臺省幾空公與同官

密揭救

言窮又

趙文懿公

公